


松江府志

十八九



漢書門			
二	三	五	三
冊	架	函	號

內閣文庫			
九	三	五	三
函	冊	架	號

內閣文庫	
番號	漢 2353
冊數	24 (11)
函號	292 17





松江府志卷之十八

官署

自縣陞為府復析縣為四官署故多改易撫今而存古
凡以考治也舊倣蘇志條目錯出今領以郡縣新署而
向所建置分附于後以別之

府治在城之中前臨官街後枕流水唐宋及元初華亭縣
治也中為治廳榜曰承宣後堂曰忠厚承宣左為推廳
其東北為經歷司右為永豐庫其西北為照磨所翼以
兩廡左為勘合吏戶禮房右為承發兵刑工房前為儀
門門內為戒石亭其外為譙樓後堂之後為知府宅左



右爲同知宅其下爲通判推官宅爲鑾駕庫爲架閣庫
爲幕僚宅又其下爲吏舍儀門之左爲土地祠右爲賓
賓館譙樓之前翼以榜廊其下爲旌善亭申明亭亭之
間有坊表曰明德新民官街左右各有坊曰承流曰宣
化元初立府卽縣爲治越十七年甲午知府張之翰始
撤而新之大德癸丑嗣政周維惠遷譙樓於外而作儀
門及後寢重紀至元庚辰知府楊伯野台展堂廡而大
之至正初達魯花赤哈只作中寢己丑譙樓燬知府王
至和新之明洪武初知府陳寧建守貳以下宅同知宅
在知府

宅東其南爲推官宅經歷司及知事衙通判宅在知府
宅西其南爲照磨所及檢校衙其後添設董漕同知宅

在通判宅北水利通
判宅在推官宅北永樂中知府黃子威重構穿堂展

兩廡及新經歷照磨廨宇正統庚申後堂及兩廡壞知
府趙豫重修天順間知府李惠重建廳事成化中知府
王衡始置刻漏及畫角於譙樓凡門以內之制悉備惟
譙樓前壑民居迫隘弗稱弘治己未知府劉琬出官鑑
易而遷之以其地增構榜廊跨街而南遷旌善申明二
亭於左右二亭洪武初建
在蓬萊巷西遷舊福民坊於亭之間易以
今名於是規模弘敞浙西諸郡莫之與京矣正德間知
府喻時櫛門坊重建吏舍嘉靖間知府方廉修府署名
堂曰勤政曰和衷賓館曰親賢知府臧繼芳重闢府治

知府史直臣重建賓館及經歷司萬曆初知府賈待問
修譙樓改建三坊東曰旬宣西曰師帥南曰東南保障
復遷旌善申明亭於橋南之左右知府許維新改建督
糧廳知府張九德修府顏其堂曰琴鶴勒題名碑於廳
壁建賓月樓於寢室之左

本朝初郡譙樓燬於兵順治十六年知府祖永勳率屬捐
造樓成雄麗視昔有加焉康熙元年知府郭廷弼重修
儀門及和衷堂復建治堂前軒

元公解記 松江古華亭民物繁夥為天下壯縣天兵
渡江陸華亭府尋改松江至元辛卯直隸省郡號雖新
縣治仍舊越明年之翰由翰林牧是郡與達魯花赤麻
合馬廣威同知王渠失不花奉訓府判趙德衍承務一

意催科奚暇他及又二年偕廣威越省力陳弊病之尤
者除荒租等額十餘萬府中漸廓廓然於是同僚叶議
今民脉稍甦瓜期將近廨之不修復何待迺就木瓦竹
石之所有補短以長代朽以堅易缺以完闕則平買出
俸金以酬直遠近聞者無不喜至有一二貴室願為之
助或以梁或以米或以工役之費上不侵於官下不及
於民始甲午冬迄乙未春季四晦朔而厥功成崇數尺
之基敞五間而耳以左右屋者廳事也拓數丈之地合
兩廡而翼以東西樓者吏舍也而又署參佐於乾設架
閣於巽嚴狴犴於坤遠庖厨於震其規模纒十七八翬
飛翔舞已與雄藩巨鎮相頡頏每庭空吏散倚危欄送
落日顧瞻徘徊覺三泖之增明九峰之益峻清思祛簿
書之昏新句解鞭笞之勞呼皮陸於蒼煙翠靄中間常
時唱酬處亦可為公餘之一樂闔郡大賀後廣威舉酒
屬之翰記昔叔孫所館一日必葺陸抗臨去繕完城圍
我輩固不敢望其於視公府如傳舍略不加省而去庶
無媿故書其詳以告來哲元貞元年四月初吉朝
列大夫松江府知府兼勸農事張之翰記并書
元重建譙樓記 松江府古華亭縣也本嘉興地宋屬
嘉興為壯縣入國朝以五萬戶之上者為州華亭戶登

十七餘萬至元十四年遂陞華亭爲會府明年改曰松江府二十九年又割華亭縣東北地爲上海屬邑凡二馬由是關府解崇建譙門與名藩巨鎮同一雄大至正六年冬市廬災延譙樓明年夏淫雨秋大水未遑營造又明年秋達魯花赤荅理麻公來年大有與知府王公至和同知拜任閩洎府判刺馬丹推官曹思義僉謂譙樓鼓角以令民廢而不治非所以司天時謹民事也蓋亟成之遂各捐俸金鳩工聚材以九年四月九日經始閩四月而竣事工以日備材以時值而僦梓鐸爭趨商賈售鬻惟恐後若民之營其私室然樓凡四楹其高七十尺視舊有加其下壘甃固密廣道軒豁重檐上飛聳出雲表風雨旋薄安然若泰山之崇鏡鼓譙震如雷出天上落成之日守臣監軍賓佐吏士咸集登府榜其顏民父老舉欣欣然有喜色而相告曰麗譙之災非天警也歷七十餘年遭逢賢守貳政化更新吾儕小人猶及戴白扶藜以仰瞻壯麗一何幸歟夫重門擊柝以待暴客此古者防民之道未聞鼓角之令後世晨莫傳相警呼至唐馬周始制鼓以代參以挈壺氏之職使民出入作息有恒度奸民不敢肆游徼良民得安厥居而不驚所謂不肅而成不嚴而治矣昔之觀善政者或以更鼓

分明而得之譙樓之建固係於政治者如此是宜書以勸來者賜進士出身承事郎前台州路天台縣尹兼勸

農事會稽

楊維禎謨

明壺漏記畧 郡有麗譙以司晝夜設壺漏以驗時刻久矣而晝夜百刻之圖今所傳者爲唐司天少監呂才所著其制以百刻分十二時時有八刻二分刻有六十分秒其二十四氣每一氣差一分之半冬至日極短春分而日晝夜半平冬至後行盈夏至後行縮陰陽升降日晷短長之期昭然明著範金爲壺注水浮箭以區區之人巧測茫茫之天道時昏時旦澗冷無爽蓋先民竭心思而有作理以事寓器以治設皆有切於官民之所需而不可忽焉者也松江府譙樓舊有銅壺滴漏設官掌其事矣久而廢弛因仍以焚香爲驗而香有燥濕風有疾徐往往不能悉準以便爲安莫知改作成化戊戌稷山王侯以北臺名侍御來牧吾郡始至與利革弊修廢舉墜以安神人暮夜聞鐘鼓知漏過差日晡時以作事政之所係不小銅壺可後復哉乃選耆民之能者授以戎規俾卽古杭而治焉不越月以是器獻凡爲具夜天池一日天池一平壺水壺各一銅人持尺者一定南星

影表一水海一添水桶一更籌十二籌架一既嚴勅所
司隨時注視復縱民就觀三日俾知古作之妙於是縉
紳士子老稚黎庶緇黃藝技行旅商賈踴躍扶携莫不
加口嘆所未覩夫輿杠時成君子謂之知政更漏分明
識者審其能官侯能易簡易知習為經久之具以利
官民之興作非知政之大體歟是為記郡人李年誤

本朝重建譙樓記

皇帝御極之十四載冬予膺簡書來守此邦周視四履
有事修備捍海隄塘為潮汝侵嚙行且螳隕亟謀所以
塞之雉堞干櫓實庫且亟謀所以崇之飭之惟是郡
廨前楹向有麗譙燬於兵燹余晉諸父老子弟而語之
曰是巍然者匪僅守土者之輪奐已也蓋九重蠲賑
之恩於是焉布憲司令甲之申於是焉縣而又鼓角是
警刻漏是設俾萬姓無失晨昏咸知作息焉則奈何任
其廢而弗舉於是為之庀材范埴募役率作閱期功告
厥成暈飛跂翼頓還舊觀或退而議曰甚矣守之愚也
從來宦轍傳舍官守茲獨孜孜肯構我躬不閱遑
恤我後予曰唯唯否否守之不能率循古道安茨憇棠
而丹雘是厯余滋媿矣顧上棟下宇取象大壯張形勢
之勝繕維垣之固於道弗倍春秋凡營一宮修一門於

必書所以重民力紀興作也故鄉校無毀丞歎其仁石
室斯築賢聲罔替予豈敢以一日之愚邀百年之譽哉

因為之記時順治己亥八月

月既望知府祖永勳誤

舊推廳

在府廳之東南元延祐初建
知府楊伯野台遷於廳西北

元推廳記畧

郡置推官二員府事簡止設其一必擇

人而授廳居府治之左俾處其中悉心臬事不以他事
溷之其任之專且重若是宜浩以甲申之秋承乏於斯
時廳不復存矣視其故址距府稍近即其西偏隙地立
屋三楹欲其審慎也室必完而固慮其壅蔽也牖必踈
而明柱石貴乎直視其守正不撓也墁堊尚乎潔戒其
清白自勵也蓋必密甃必平知斷獄之不可踈而在也
既成而居之嘗喟然太息以為皇元之用刑庶幾先王
之刑而非後世之刑也居是官者其可加深酷之刑而
不體欽恤之意乎廳經始於至正五年三月庚辰落成
於是年五月壬午不可無一辭以述其意也記而刻之
石俾來者知作之所始至正八年儒林郎松江府推官

趙宜

浩誤

本府志 卷之十八
舊首領官幕

在府廳西北張之翰記所謂署叅佐於乾者是也

舊知事廳

在府廳東北古縣治東廳也今其地為經歷司

舊永豐庫

在府廳東南即故推廳址元重紀至元六年知府楊伯野台重建府學教授林聖子有記

舊架閣庫

在府西北新推廳址元延祐四年知事李彥創建蘭溪判官邵文龍有記

司獄司在府西南其址舊證覺寺也洪武十三年自府西

舊承廳址遷於此

古承廳在府治西垣外元至元甲午司獄張彥良改為獄縣丞魏虞翼有記

記

軍儲倉

詳見倉廩志

舊稅課司

在府治東東震橋下元至正十三年以府西舊雲間驛為之明洪武五年徙建於此天啓

初裁

舊織染局

在府東南舊軍儲東倉也明洪武初開設於府南雜造局三十年以局為守禦千戶所解

明年改建於此大使臧秉中始營廨舍至永樂十二年大使郝震添建織房崇禎初年以停止織造裁省其官署亦尋廢

陰陽學

醫學

惠民藥局並在府東石獅子巷側即故

鎮西廟也元初立三皇廟設陰陽醫學於門之左右洪

武中華三皇廟設惠民局於鎮西廟門宣德四年遷鎮

西於三皇廟址因盡以其地建學與局並治云

按舊陰陽教授司在府西二百二十五步元貞初立延祐初改設於三皇廟左今為巡撫行臺官醫提領所在普照寺前古中和樓也元大德中立惠民局設所領之後廢舊醫學在沙家橋東北三皇廟門左元至元間始建於普照寺南繼遷里仁坊內延祐丙辰作新廟始遷焉

僧綱司在南禪寺

道紀司在僊鶴觀

舊黃渡河泊所

在蘇州府嘉定縣二十都洪武初建管嘉定崑山華亭上海漁戶弘治三年知府劉璟奏革其漁課均於秋糧項下帶徵係蘇州者併沙頭河泊所

巡撫行臺在府西南沙家橋東北舊三皇廟也宣德四年

巡撫大理寺卿胡槩即其地建吳輔國將軍廟而治事

其中天順中知府李惠始遷於西鄰隙地然廳事猶仍

故宇成化中知府劉璟盡撤而新之規制始備西傍廟

垣有山亭特為幽雅弘治己未知府劉琬拓外門改舊

橫街折而南循河為石梁前通大路榜曰鴻達左一區

為縣學射圃後有小廳榜曰讀易處府官候見巡撫則

居之

今南察院

察院三 一在石獅子巷東元江南浙西道肅政廉訪分

司舊縣尉廳也明改為察院凡御史行部則蒞焉永樂

十四年通判柳榮重建廳事榜曰肅清弘治七年知府

劉璟作清風亭於後堂之北

今東察院

一在里仁橋北即行

用庫凡御史並蒞則後至者居之

俗呼小察院今廢

一在長生

橋東萬曆間以延慶講寺基建為運司分署後設水利

糧儲道駐劄道革仍屬分司臺使或居之

今新察院

按府東舊有廉訪司公廨元至大三年僉廉訪司事吳舉知府季祿兒立門額副使臧夢解書皇慶初僉書也

先不花書堂榜曰澄清延祐中副使張揆僉事普顏作
霜清堂於後堂之夾室榜曰激濁曰正心後僉事李晉
齋書欽恤字榜之中堂尚克和
又篆榜曰明德面諸欽恤云
元新建司廨記 國朝外置行御史臺在建康者江以
南諸道屬焉道置肅政廉訪司在杭州者浙以西諸路
府州屬焉浙西爲路七州若府不隸路者二松江其一
也諸道之司使二人常居署以總其事使以下副二人
僉事四人時出司以分巡其部使者率以歲八月出
巡其所部越明年夏四月乃還諸路府州必一再至夫
暑錄囚又至故所部必營棟宇爲公所至輒引僚屬郊
迎以入松江爲府大可埒諸路而公所獨未之有惟以
府廳事署事去至大三年僉事吳公彥昇至與知府李
侯祿兒始經度之得故縣尉廳址於府東偏爲方五畝
有奇首命義士夏椿出敦匠事是歲冬十月興事皇慶
元年夏五月落成廳事中起前軒後堂翼以修無繚以
周墻門高廣有度庭出入有路房室庖湏完具爲屋凡
二十七楹用錢四萬三千二百餘緡食粟二百五十石
夏氏益十出其三四焉於是公所之大可埒諸路而退
食優游燕息之所未之有延祐四年夏六月副使張公

仲端與僉事普顏君卿分部焉入居之果以爲未稱乃
命夏氏復作霜清堂於後明年春三月堂成且榜堂之
夾室左曰激濁右曰正心皆刻公所書字其上又用錢
六千九百緡食粟二十有六石而夏氏復十出其五六
焉於是外視則宏麗軒敞內視則寬潔靜深諸路顧弗
得與埒也已又明年公再部松江將還屬鎮記鎮竊謂
夫廉訪之職所以明達天子耳目綱維我邦憲機括我
民俗所部吏廉勤必勸貪惰必劾獄寃滯必審理民利
病必興除守令閣詔令弗顧必察學官輟教養弗舉必
罰士有德行道藝可從政必舉勢家較山林川澤之利
爲豪奪必去農水旱告災不以實河梁港道郵驛館舍
不治諸政事不如法者無一不當問雖然責人多者亦
多受責於人於此焉鷹揚隼擊照燭鑑如舍爾狐狸殪
彼豺虎望風知畏民得安堵則行御史臺將於是乎陟
之其或罷輒不勝疾苦無愬聞於大體苛察細故行御
史臺將於是乎黜之是故能詳於責人又不忘乎自責
是之謂稱職鎮也昔歲貢於路而吳公爲之薦故知其
賢試舉於省而張公爲之監故知其能鎮今之來萃亭
實主於夏氏故知其好義於乎二公之賢且能其稱是
職而成是解也何有若夏氏之好義知先盡力乎公役

又難能也故直書其事以告來者延祐六年冬十月華亭儒學掾前貢士嘉禾俞鎮記明清風亭記 國朝綱紀宇內以耳目之司任都察院其所由來尚矣若乃兩畿以暨諸藩則歲命御史各一人分按之既又以鹽政易蠱則專一人既又以兩畿當嚴慎固之勢也則各從其院舉捕盜者一人皆謂之巡按御史其餘因事而命者弗與焉其所歷官次皆曰察院蓋曰官之臧否事之興廢民之利病悉於是乎察之也松郡之有察院舊矣蒞於是而賢者鼎彝可得而逆數也乃弘治癸丑冬光州劉君廷瓚宗敬奉命至焉百職盡舉吏畏民懷乃退倚北窻進郡守劉璟指地之奧曰吾將於是乎亭焉昔人有云氣煩則慮亂視壅則志滯吾將於是乎清心寧神以與君輩從事焉守奉命唯謹爰謀僚屬擇義官之能且慎者二人俾督厥役亭成亭自院之退食堂簷楹之西少折而北繚垣屈曲不踰數步殆所謂奧如者曰奧宜潛思及亭則翬簷六出欄檻周匝縱日游神則窪而池研而石亭亭而荷洋洋而魚修竹茂林陰晴儵忽舉輻輳於其間又有所謂曠如者曰曠宜宣志蓋君所授規也君既達觀而喜焉因命之曰清風亭君於是游以懋以潛以宣以延父老而

觀風焉至乃屬于記是為甲寅夏四月也時華亭尹李瀚初至遂請刻石以表亭右翰林院修撰錢福記明謝珠清風亭讀郡志有感詩 門掩秋燈客倚牀西風微雨夜初涼素心不向愁中改壯志偏於靜裏忙吳國山川人杳杳陸家門第月蒼蒼十年回首驚塵夢欲放長歌入醉鄉時庚午秋也李森先詩 徙倚官衙月正明尚餘寒柝在高城空庭積水松陰亂小閣張燈夜氣清賸有黃花隨處滿那堪白髮向秋生故鄉海味何曾減殊笑鱸魚浪得名

提督府在府治西南僊鶴觀西

本朝順治五年提督張天祿以前太師徐文貞公階居第

為府今梁公化鳳奉

命提督全省崇飾壯麗蔚然帥府矣

文貞子姓彫落第廢而輸賦如故梁公數

軫念

焉

雲間遞運所在谷陽門外

詳見驛傳志

清軍局在城隍廟東本興聖寺地宣德初於此置清軍局

通判詹山黃平得西湖書院古碑輦置局中因以楣之

棠溪榜為書院而治事如故成化中同知于準重修積

久頽廢崇禎間以其地建董文敏祠

棠溪書院記 松江郡治東南舊有清軍官治事之所其地寬衍連溪環沼吏部主事黃公平來為通判創廳堂齋舍榜曰棠溪書院同府審公祥俞公欽傳公愷來繼其事植碧梧數株於內又創外門新門額成化甲午冢宰尹公以世衡于先生前判湖廣長沙河南衛輝累有治績奏陞本郡同知先生至重加修葺前為治事廳後為燕寢堂左右兩廡外設門墻廳之楣揭其師聘君康齋吳先生黃堂勤政四字又以豈弟君子民之父母八字置於廳之北壁書太極圖於北壁之東書西銘於北壁之西堂之中仍揭聘君所書勤謹和緩四大字於

楣書平易近民視民如傷於堂之北堂之東西壁書古今嘉言善行有關於政治者又於堂之兩榮分為四宰東北曰清軍局軍冊藏焉西北曰清匠局匠冊藏焉東南曰琴室中設聖賢像栗一囊著一櫝置於左右西南曰雪窻中置一榻傍積古今書籍揭懲忿室慾遷善改過正心誠意進德修業十六字堂之前虛軒幽敞榜曰太古軒軒之北書吏隱二字琴室之前曰翠竹軒軒之左有魚躍池池之傍有釣魚磯池之內有蓮因書懋叔愛蓮說於壁雪窻之前名碧梧軒軒之西南作棠溪橋雜植花卉蔬果竹木數十餘種先生每日升公堂與郡侯王公及諸同寅商確政治畢即造書院理公事既暇則深衣幅巾退坐寢堂讀書鳴琴遍觀格言以自勵又其暇或賞花或看竹或觀魚或垂釣綠陰蒲窻清香透戶草色連塔同官士及有來書院者則相與講論道義游觀景物情思灑然而不知倦也居仁昔嘗受春秋經於先生以情誼之厚不遠千里來謁乃得於書院聽教累日因命記其事居仁雖不敏有不得而辭者昔孔子謂誦詩三百授之以政不達使於四方不能專對雖多亦奚以為先生於諸經子史無不講究必能推之於政以及松民民安且樂然後先生之樂可得而遂也世固

有以讀書為講誦之資利祿之媒者豈不重可惜乎因記其說以俟來者先生名準平齋其號江西饒州安仁人成化辛丑夏四月胡居仁記

董漕廳在縣學東弘治中建以貯府之折糧銀布者今廢

不治凡同知蒞任俱於督糧宅廨視事

督糧廳在軍儲北倉嘉靖五年建通判郭允禮重修名其

堂曰勤政堂

徐文貞為編修時有記石砌署壁後傾圮崇禎中知府方岳貢悉以其地斥賣于民

取值充餉

理刑廳在東震橋東里仁橋北行用庫之左元祐初建知

府楊伯野台遷於廳西北凡御史按部隨巡推官駐劄

焉即趙宜浩所記推廳也

兩浙都轉運鹽使司分司舊在下沙鎮宋建炎中置明正

統二年遷於新場北領鹽課司八

浦東場鹽課司在華亭縣七保宋置內分六團

袁浦場鹽課司在華亭縣十四保舊名袁部宋置內分五團

青村場鹽課司在華亭縣十五保宋置內分四團

下沙場鹽課司在上海縣下沙鎮宋置明正統五年都

御史朱與言奏分為三本場內二分五團二場鹽課司在上海縣

十九保內分三團三場鹽課司在上海縣十七保內分三團

清浦場鹽課司在蘇州府嘉定縣八都明永樂六年設

內分

三團

天賜場鹽課司在蘇州府崇明縣宋置場不分團聽民逐便煎煮以其

有涉海之險也凡各場竈戶有犯應犯役者率遷調於此云

松江守禦千戶所在府治東南淨土橋西明洪武三十年始分金山衛中千戶所官軍守禦府城千戶孫勝以故元萬戶夏啓之居建所設千百戶所於門之左右翼西為鎮撫廳東北為祭纛臺東南為二郎土地廟永樂中千戶李覲建後堂造作局藏器庫旗纛廟并列榜廊於門外成化十二年千戶顧禎復榜其堂曰勤政樓曰拱辰凡傾圮悉加繕治又立義倉弘治十六年千戶楊欽別建十器局徙二郎廟於東北高其中為三門新鎮撫

廳於舊址北演武場舊在太平橋北南城下有演武廳撥太平南倉為所倉正統三年革去嘉靖末改為濟農倉今軍器庫三楹尚存倉後遷演武場於南關外官紹塘之左即舊水次南倉基也歲霜降前一日守禦千戶從演武場迎致旗纛之神至所祭告焉

明千戶所記 按圖志松江舊無城元季張士誠據蘇來築城九里一百七十三步設水旱門各四國初士誠就擒分太倉州二衛羨卒守局鑰洪武三十年始詔調金山衛中千戶所來守禦遂立所於元萬戶夏啓故址舊有堂三間軒稱是今為視事廳後有樓以休息本夏氏藏書樓至正間巷民弗戒於火延燬千餘家而是樓巋然獨存既為所而古屋不足以居千戶費誠孫勝始謀拓而大之建大門於廳前而其左右賓屬吏士咸有室宇永樂中千戶李覲高旺顧義金浚袁壽楊信復續建後堂及齋房尊榜房凡數十楹歲久圯壞弗治今千



戶顧禎毅然以修葺為任首出私帑爰募好義咸願有
助迺召工人市良材運堅甃誼日庀事先作儀門以屏
內外次及堂樓齋庖庫廐廡舍悉就整飭聖髹彤輪
兵嚴翼繚以周垣馮馮言言昔所未足於今始備然又
必爰究度不浮於度維蠹廟敞甚神罔攸棲則撤故一
新高敞宏麗幾倍於昔迺塑像於廟於赫如在庶幾對
越有虔其仍慮士有菜色立義倉於廟西先捐穀百斛
行勸助法得千石饑則發廩以濟困卒復出羨財繕完
兵器藏之武庫用戒不虞百工就緒迺揭舊額於堂前
日勤政後曰清慎皆前千戶顧凱所書示不没人善而
於其樓特名曰拱辰則所以志不忘君王之意凡屋以
間計者九十有九墻以尺計者一千四百六十有奇經
始於成化十二年六月落成於明年
五月迺礮石記之刑部主事侯方撰

舊有浙西鹽使司

在西湖東宋西鹽倉也乾道中廢為茶
鹽分司景定初革元復改是名尋罷

浙西鹽提舉司

在府西南一里
舊賣納鹽場也

鹽監東西廳

宋建其一在府治西章窰為鹽官作
思堂於其中後為丞廳其一無考

支鹽官解

監鹽解五

分置浦東橫浦袁部青村下沙三場領浦東
金山遮山柘湖橫浦袁部六鶴橫林蔡廟戚
滌青村南青村北下沙南下沙
北大門杜浦南踰等場十有七

都倉廳

船場東西廳

並宋
建

監稅解

監酒解

市舶監官解

在瑯湖
北渚

財賦提舉司解

府治西南四百步元大德中籍沒朱張
貲產以賜椒官故立三司握其賦一名

平江一名集慶及置江浙財
賦都總管於杭統治之後廢

稻田提領所解

在府治西南古善治堂址元後至元五
年沒入上海朱國珍管明家以賜丞相

脫脫立所
掌之後廢


都水庸田使司 元泰定三年卽府治建尋罷

按雲間志有敕書樓宣詔頒春二亭東西架閣樓南書院
花園讀書林延桂觀政壺天淨涼藏春竹節等六亭嘉
禾志有燕超堂僊鶴亭皆不見於前志則元貞時已頽
毀矣元季屢更兵燹旋復繕治向之堂宇多經改易惟
廳事承宣堂爲元貞重建時所榜大德間知府周維惠
移榜於中堂揭張卽之所書公生明三字於廳事至正
中達魯花赤哈散沙以卽之所書食淡精神爽官清夢
寐安二牌揭之前楹卽之書皆九華程熹紹定間宰縣
時所刻也至今猶存

芳蘭堂 宋政和中華亭令姚舜明記元爲府治中堂

弦歌堂 三山亭 艮閣 並在舊縣治東宋元祐中令劉鵬建

朱之純詩序 彭城劉侯元祐庚午來宰雲間下車一
日先修庠序次立教戒下至簿書期會各有條理今來
十旬一境告治訟庭清明幾致刑措於是卽縣齋之東
新其一堂一亭一閣堂曰弦歌亭曰三山閣曰艮閣與
士之賢者講論歌咏於其中蓋將有志於美風俗也然
予嘗思之自浙右爲邑未有繁劇過此者其境東南濱
海西北負江帶湖方二百餘里其戶口除浮寄浪居而
占籍者亦不下數十萬比嘉祐初太常丞吳公所治往
往三倍其數故生齒日衆情僞滋多而獄訟少有衰息
厥後欲鎮以寬者失之慢矯以猛者傷於刻雖日晏不
食力愈勞神愈耗而姦究鬪狠終不能勝四十年間民
用不靜劉侯之來未幾而風移俗易宜其游心三山鳴
琴一堂登高而賦之使人知仁義禮樂之意也予聞隱
湖西北有客見過因問邑之治否誦公豈弟出於自然
且曰方周盛時齊人五月報政文公猶驚其速處今之
世而劉君治江海僻陋之地曾未十旬了無可治則是



古道復行豈不賢哉噫以客之所言證予之所聞則君坐斯堂宴斯亭登斯閣也宜無媿於古人矣客退因序其所聞而為之詩

東堂 卽三山亭紹興間陳祖安為令温大著改日貽年元為府治東堂

思齊堂 卽舊絃歌堂

招鶴亭 卽舊良閣改易年月俱無考

盡心堂 在府治西偏舊葉堂也宋政和間姚舜明為邑以元豐元符斷獄制書揭之獄乾道八年嗣令

陳岫移置堂中榜曰盡心取夫子所謂刑者側也側者成也一成而不可變故君子盡心焉之義後葉仲英復名曰葉堂開禧三年令汪

立中重立學士樓鑰書榜

製錦堂 在府治東舊為縣令正寢宋紹定令黃岷建前有八亭東為射圃後改堂曰壺天有池亭曰觀

政元為鎮守萬戶府

製錦堂記

循治廳而東有堂三楹前此令尹之正寢也風雨漂搖垣壁頽圯予頃攝丞常欲葺治之窘事力未果尋誤恩承乏間至其地顧材壯礎堅似可支久坐觀其頽弗忍也幸天與之歲民大和會課賦所入僅不之供於是搏浮約過銖積寸累胥致以漸乃涓吉程工翻葢其上甃砌其下而中飾以丹堊東廡西廡弗改其舊面直南有隙地荆榛蔓生弗可寓目亟芟夷蘊崇之杵平其基斲石為道環植以花介八亭其間曰歲寒曰雪香曰宜雨曰倚晴曰載春曰棹月曰烟翠曰露紅由南東而北養竹百本夾小逕逕盡又築亭日以勁節又北度小橋過而西卽昔之招鶴亭也亭地勢高歷年久亦葺其廢而新之下植花木堂堂居其南堂有軒軒數尺外有屏以限園間一啓閉方春秋佳時花卉懋盛風物清楚則中設酒罏俾邑人往來嬉游其間以樂太平而歌豐年亦庶幾民和時洽也又東買民地闢為射圃縱之濶為尺八十有四衡其長三之經始於紹定元年冬十月之壬子竣事於次年三月之乙亥梓人匠藝各以其職聽工以口計者二千四百六十有奇竹木灰瓦甃石悉售以時直錢以緡計者一千二百四十有奇買地之費不預焉既訖工榜其堂曰製錦客有問予所以名

堂者則應之曰美錦微物也古之君子猶不使人學製千室之邑其為錦也不亦多乎予涼於材拙於用弗盡其心則害於而邑豈直一錦之傷而已民隱吾懼其無告而感也念念而求之吏姦吾懼其乘間以肆也旦旦而警之吾又懼夫勇於為而舛也則無一事不加謹焉無一物不加察焉公退之暇登斯堂也觀其名惟其義經緯之疎密布置之後先纂緝之勤紉補之工凡可推而達於邑者皆令之所宜深長思也堂後有小室題曰無倦步而入使人肅然敬畏之心生於以滌昏而警惰然則予之所以名者豈苟云乎哉客唯而退因紀其葺理顛末誌諸石紹定三年雙井黃崖記并書

近民亭

在府治東偏宋端平間令楊瑾立元為館驛

建亭記 令最近民紐銅章縮墨綬環百里而撫字者近民之職也對門槐挹庭水萃兩造而聽決者近民之所也若夫堂宇既深令復於暇日度地築亭蒔花植竹以宴息其間時非與民接而亦曰近民可乎余嘗讀書至民可近不可下之訓知古所謂近民非必身相周旋言相唯諾手相授受而後為近也一絲一粟必思耕織

之勞而不盡其財一椽一坵必思斤斧之勞而不盡其力一器一用必思埴埴之勞而不盡其技痼癘乃身保若赤子民其可忽乎哉華亭地廣民繁余兩年間治理無他術唯力行近民之政而征賦樂輸獄訟寢簡民粗相安於無事斯亭之立斯記之作蓋將朝夕觀省無替厥心且樂為知心者道也端平丙申良月旦日邑令會稽楊瑾記

閱武亭

初在府西北二里舊社稷壇知縣楊瑾改建於舊縣學按華亭亭學舊基即今府學射圃記與續

志皆稱以舊學為閱武亭謂此地也通志以爲鎮守萬戶府改創今從記文 改建閱武亭記 華亭壯縣其地北距江西據泖又東南綿亘大海幾二百里雲濤煙葦浩渺無際寇攘草竊隱見不常昔人慮之置鎮一尉一寨四縣又置防城土軍一百有五十人令以軍政繫衙亦密矣承平備弛額缺不補防城存者僅三之一端平乙未冬邊境繹騷有吉命漕臣選官屬分行招刺而華亭軍額始盡復舊鎮尉寨亦如之明年秋會縣遷學宮軍相率請曰縣有教場寓於荒僻之野地素卑水潦適至則泥淖沒足且以

學舊地改為焉乃屬警曹趙君汝墀躬為相度已而開道路築垣墻建亭宇不月而成其秋大閱有爽塏便近之利無卑汚涉遠之勞旂旆精明鏡鼓譟亮觀者曰縣真壯哉昔夫子謂俎豆嘗聞軍旅未學然禮出征必受成于學反釋奠以訊馘告他日又曰我戰則克祭則受福蓋得其道矣然則軍旅俎豆一而已矣今縣因舊學地為新教場上以副聖天子不忘備禦之實下以慰軍士不忘教閱之心而文事武備又若不相期而卒相合者亭既成因論本末刻之石庶後來者有考焉端平丙申九月旦日邑令會稽楊瑾記

華亭縣治在府西望雲橋北元王簿廳也縣初陞府寓治

于舊東尉司至元壬午遷于此日河抱于南月河環于北相傳建治時形家言

月月夾照官多廉明遂定址焉或曰即宋翰林修撰李夔為尉時生忠定公綱故處甲午知縣柴

琳達魯花赤兀都蠻鼎建廳事榜曰牧愛廉訪副使王明益書至

正六年儀門兩廡火知縣張德昭繕完門額儒學提舉班惟志書王儒

學事徐良記後燬于兵入明以次興復永樂中復火宣德庚

戌知縣吳大用重建正統戊辰知縣郭文直增修弘治

乙丑知縣張岐建後堂榜曰冰雪岐自為記嘉靖間知縣聶

豹朱執中相繼修葺萬曆甲辰知縣熊劍化作屏墻于

大門南左右置儲胥設兩門榜曰敬天威畏民志天啓

癸亥知縣郭如闇復以訟繫諸舍偏處捐俸買地擴而

新之規模宏敞矣廳事之左為典史贊政廳右為架閣

庫其後為冰雪堂其西為庫知縣宅在堂後廳事前為

戒石亭兩廡為六曹廡外為吏書私廨儀門之外東為

土神祠西為寅賓館館前為內監房重囚禁繫于此其輕繫在西南隅麗

大門左右為榜廊縣丞二廨一在東北隅主簿廨

在其南一在西北隅典史廨在其南其制大約如府而


門內列十櫃以納賦稅焉

本朝仍之順治中知縣張超繕葺廳事增作宅廨

元新解記畧 華亭漢故亭留宿會之所唐天寶十年始置縣屬蘇州石晉天福五年分隸秀州為天下壯邑至元丁丑春因陞華亭府改名松江即縣之公宇為府治寓縣治于東尉舊司壬午秋始以昔時主簿廨舍為新縣屋纔二十餘間頽圯狹隘門與廳參差且未有獄禁甲午春達魯花赤兀都蠻承務來監慨然有增修之志爰及縣尹柴琳承務暨同僚佐史協議悉捐已俸積千一百緡買民地二畝一角三十步初建推廳門軒之間七狴犴之間十有六元貞乙未再積俸三百緡買民屋五間地七丈四尺築石岍十有五丈重建前後廳堂之間十有三左右吏舍之間各十有一遷大門與正廳對砌中道二十有八丈復立古經界苗稅二碑於門之

兩廂典吏有幕架閣有庫戒石有亭土地有祠庖厨有舍靡所不備始三月丙辰終四月乙丑廉訪副使王公明益題其堂曰牧愛蓋謂國家以百里生靈之命俾宰邑者司之如為人牧者保之愛之則息以蕃擾之害之則彫而蔽茲牧愛之所以命名也縣治既新邑宰屬允中為之記故紀賢侯作縣之功并述王公名堂之意以識歲月云元貞二年八月松江府儒學教授馬允中撰

明重建縣治記 正統十四年歲在己巳春二月華亭儒學訓導泰和陳登以重建其縣治成書其始末屬國子博士王君積來請記謂華亭畿內大邑也知縣嚴郡郭文直抵任逾年矣持已公正理事勤能及民有惠愛政平訟簡顧縣之廳堂歲久頽弊謀欲新之言於郡太守黃侯侯曰宜請於巡撫工部尚書周公曰宜乃命出在官錢市材木募工匠具百費文直喜與僚佐捐已俸而邑之耆民胡德裕輩聞之亦以粟帛為助於是治廳事及後堂及幕廳次及兩廡與門及吏舍縣治益煥然而新矣肇工於戊辰夏四月是年冬十二月畢工焉乃書以記之俾勒石於學官則後之人皆曰職教者能善善其令令其有不觀感而益興於學乎景泰三年春



三月禮部尚書

臨川王英謨

修治邑門記 吾華亭瘠而醇墨者曰其膏易溜也媮者曰絲棼而難為理廬陵郭公來蒞吾邑喟然嘆曰賦徭重而民粟不登於場令不受膏且予民肥也壯邑之務比於下部然民依耕織而謹媚其上寬徭止訟條緒易輯耳居三年政成化洽民用大和而公益從容委蛇為邑人開便利事時有餘力邑譙門臨五父之衢環而居者比廬輻輳國中涂執侵改舊步公因火災不戒下令撤而新之還其官地之侵於民者豪強斂手刻日戒工萬民子來不日而成亭表軒舉塞門洞開廣場滌除九衢通明公又念輕刑以下訟係諸舍實偏處公屢之隅窄延湫底蒸為厲氣爰度幕廳南隙地廣闢新舍以安纍俘役不勞民錢不損帑蠲其常廩以克經始于是父老告于張子而記其蹟張子曰古者佚道之使勞一利百事就民安其在循吏具有故事不足為公記惟是公飲水刻勸恬愉樂易凡其思慮民事愉眾禦奸悠然滿志夫真廉無聲色至靜無譁諫至誠無華彩三者公皆足以載之故吾記其大者以示後之人

天啓四年歲在甲子人子賓客張翽謨

舊縣治

唐建歷宋無改沈遼攝令時常勒箴于門至元改為府治

宋縣門箴 政之善出于是不善亦出于是斯民何知惟今所置勿謂可欺固亦易制師言不私是乃可畏朝而闢焉小大必治逮昏而闔以休吾吏治得其平謂我豈弟有或不然乃門之媿熙寧十年錢唐沈遼記

舊承廳

今府西垣外真聖祠

舊簿廳

今縣治

舊尉廳

今東察院

元縣尉司

府東南一百七十步古都倉廳也皇慶二年縣尉魏澤建

諸色官錢庫

在縣治

田園文籍庫

在縣廳東側宋令楊瑾建以藏經界籍冊

儒學在縣治東南

詳見學校志

巡檢司二 詳見兵防志

申明亭二十四

旌善亭二十四俱洪武十五年建

宋紹定六年建養濟院在谷陽門外平政橋西明洪武七

年同知程奉義重建今仍其舊

舊有平準庫 按前志在縣南錢家橋西宋建元因之

東西稅務 宋建元併為在城務 酒務 縣西二百步

市舶務 並宋建元革 大盈務

南橋務 亭林務

金山稅務 茶鹽稅場

青龍茶稅場 以上並元建

南橋稅課局 弘治十七年革以下俱明初建

小蒸稅課局 嘉靖三十年革 七寶稅課局 嘉靖五十年革

楊巷稅課局 後徙宋涇嘉靖五十年革

鳳凰山稅課局 萬曆八年革 葉謝稅課局 弘治十七年革

張涇堰稅課局 嘉靖三十年革 金澤稅課局 嘉靖三十年革

按縣治有善治堂 在佛字橋東普照寺西南俗呼善政堂初縣治為上官所寓則僑此視事

棲鸞堂 在舊簿廳東宋乾道元年主簿鄭茂建今典史廳其故址也

公餘風月 在簿廳後宋嘉定九年主簿四明陸屋建今縣治後堂地

折桂閣 在尉廳宋天聖四年縣尉江炳建以李忠定生于此因呼為相公閣淳熙十一年尉巫清允改

日折

梅館

在尉廳宋淳熙四年尉李昌建後廢

夢燕堂

宋嘉定十二年尉番陽洪佃即相公閣故基建堂其上取唐張燕公事為名後廢

西亭

在尉廳宋皇祐四年鄭方平建紹興間太師嗣秀王伯圭為尉時重建後尉巫清允改曰陽春嘉定

間尉洪佃

重建後廢

逃禪

尉巫清允建後廢嘉定十三年尉洪佃闢東廡一室以舊名榜之逮元不存

敬齋

尉巫清允建後廢洪佃闢夢燕堂之西揭以舊名逮元不存

思堂

在承廳本宋鹽監廳址章質夫為監官時作

思堂記 建安章質夫築室于公堂之西名之曰思曰吾將朝夕於是凡吾之所為必思而後行子為我記之嗟夫予天下之無思慮者也遇事則發不暇思也未發而思之則未至已發而思之則無及以此終身不知所

思言發於心而衝于口吐之則逆人茹之則逆余以為
寧逆人也故卒吐之君子之於善也如好好色其於不
善也如惡惡臭豈復臨事而後思計議其美惡而避就
之哉是故臨義而思利則義必不果臨戰而思生則戰
必不力若夫窮達得喪死生禍福則吾有命矣少時遇
隱者曰孺子近道少思寡慾曰思與慾若是均乎曰甚
於慾庭有二盎以畜水隱者指之曰是有蟻漏是日取
一升而棄之孰先竭曰必蟻漏者思慮之賊人也微而
無間隱者之言有會於余心余行之且夫不思之樂不
可名也虛而明一而通安而不懈不處而靜不飲酒而
醉不閉目而睡將以是記思堂不亦繆乎雖然言各有
當也萬物並育而不相害道並行而不相悖以質夫之
賢其所謂思者豈世俗營營於思慮者乎易曰無思也
無為也我願學焉詩曰思無邪質夫以之元豐二年正
月二十四日
脣山蘇軾記

亦足堂

在造船塲宋乾道元年孫紹遠建自為記

風月堂

舊市船司前瞰湖光風月在几案間宋胡承美取白樂天水檻虛涼風月好之句為名

濯纓亭

在府南十步宋紹興三年建後為官酒庫元廢

中和樓

在普照寺前下臨闔閭民富物華為一市最勝處宋紹定間邑宰程熹建元以其地為官醫所

湖光亭

在風月堂西宋范成大詩

環碧亭

在瑁湖中洲宋嘉祐中縣令吳及建及有惠政去任後民懷之元祐中劉鵬闢為堂因民所譽

榜曰思吳紹興間揚壽亭即堂址建亭曰泳波元元貞中縣丞魏雲翼重建於唳鶴灘榜曰環碧

宋朱之純思吳堂詩序 思吳堂者初名環碧亭嘉祐中太常丞吳公幾道所作也公有惠政四十餘年民頌不絕今彭城劉侯來宰雲間採民所譽因至其地見其頽毀蕪沒喟然嘆曰昔人思召公愛及甘棠戒之曰勿翦勿伐况此亭中冠一湖吳公歲時與民所共樂者乎當秋分之月夜湧出金波遇春暮之花時變為錦水若乃火雲輝空挹清風而愜解凍雲凝地睹白雪以神清有此佳麗荒而不修良可惜也於是增大其址飛出軒宇環以虹梁徘徊烟波之中浩浩乎誠可樂者乃闢其亭為堂易其名曰思吳從民望也吳公之來余方生七

歲其教條治日更歷異政不得其詳然猶彷彿記其去時父老悲啼攀轅不與前進以至空一邑隨之及予壯歲疑其得民如此乃問鄉人長者因語其施設大畧蓋有惻怛之誠感動冥嘿者焉此古之所謂遺愛者宜乎去之久而思之深也今劉侯為政豈弟又且孜孜尋訪吳之政迹欲舉而必行之惟恐後時則名斯堂也豈惟從民之望抑亦見其樂取人以為善也人固有遭虐政而思昔人之賢以幸今之復見者當其男以田功之畢女以織事之休內無饑寒之戚外無賦役之勞思以斗酒共相娛樂令於此時為之命僚佐臨清流設玉竿金鼓喧填於波間管絃嘈嘈於堂下歌者舞者形和聲和以觀游人士女溶溶洩洩如鷗鳥之浮川儻魚之戲藻皆相慶曰吳之復來矣若夫政不出此則人之不樂生令於此時精耗簿書之冗力疲獄訟之繁事既無窮應亦不暇又何能俯清冷之淵笑譚終日與之偕樂耶堂成劉侯就予索詩於是序其所聞而賦之云

元復建環碧亭記

邑西南有湖曰瑁湖相傳為陸氏魚舍湖雖小介於闔閭民居鱗鱗亭閣相望予猶記從



父老杖屨於春風中笙歌載水冠蓋翳陸下至途翁野
老携杖頭百錢所至皆醉鄉陵遷谷變奄如夢游獨先
賢印迹之地輒不與莊士俱泯嘆鶴灘其一也灘於湖
東南洲與中洲相為雄長歸於勢家莽為荆榛今贊府
捐俸入得之日我將園池其上予甚笑其迂公日不然
予家濟南山水窟所至泉石如故人故吾壺一日舍官
府之榮而不可廢登臨之適且少從止軒社翁游境與
心會輒不可一日無吾詩復不可一日無吾友則此園
非蒐裘私也他日過之有亭翼然已大書環碧其上而
求記於予予謝不敢以當復逾年公請益力一日復觴
客其間臨流有閣椿桂有堂竒峰異卉羣立錦綉此亭
不得專此洲矣公曰予成瓜且熟此與邦人共之子不
可以無述也予考郡圖經邑令吳常丞嘗於中洲築亭
亦曰環碧後四十年邦人不勝去思易之曰思吳今公
此名吾恐其不得久斯名也記思吳者不及親見其人
猶大書特書以侈其事如僕斯今當何如其喜耶於是
乎書而繫之辭曰水環碧兮綠漪山獻翠兮九層僊人
兮琉璃載雲旂兮忘歸海之水兮群飛騎鯨來兮昌吾
詩曠萬里兮有期芳滿塘兮菲菲鏗鏗兮叩朱絲綉吾
桂兮斑衣褰風月兮追隨將冠佩兮陸離鷗來兮忘機

鶴歸兮人未盡非昔環碧兮復見却千歲兮
維公之思嗟後之來者視予此辭衛謙記

願勿亭 在城隍廟東宣德間戶部員外郎同安李賢祐
督賦之所歲見東西二鄉非水則旱因以此名

亭一時題咏甚富
天順間改為社學

拱辰樓 在守禦千戶所後元夏萬戶書畫樓
也成化八年千戶顧禎重修易今名

婁縣治在府治北壽安橋西故為司業朱大韶宅

本朝順治十三年分華亭西境置婁縣初寓治于水次倉

公解十五年知縣王有極始以官緡易為縣署規制畧

同華亭廳事西為庫藏前有綽楔牘曰巖瞻兩廡設六

曹其後為知縣宅作土神祠迎賓館于中門外之左倉

廩狴犴皆與華亭共之丞簿以下廨宇未建方以次興

設焉

儒學

詳見學校志

巡檢司

詳見兵防志

演武場在南門外

康熙元年提督梁公化以知府郭廷弼及廳縣營將捐俸擴畝建廳立石記之

上海縣治元市舶司也至正二十九年始立上海縣以舊

榷場為治大德戊戌併舶司於四明遂移縣署於司

永樂

大典縣署舊在今儒學之東係松江總場

明年為海潮所侵達魯花赤雅哈

雅建鼓樓增葺堂宇而新之明洪武二十五年知縣林

庭瑾重建譙樓二十九年知縣張守約建穿堂正統四

年巡撫周忱令知縣張禎重建儀門中堂後寢為絃歌

深處正德七年知縣黃希英新廳事前為戒石亭東為

鑾駕庫西為典史廳架閣庫兩廡以居掌案牘吏士祠

祠在中門外左犴狴在中門右門外有樓以司更漏嘉

靖元年七月樓壞於風知縣鄭洛書即其地為絃歌坊

後架重屋上傳更漏下通出入十六年知縣梅凌雲復

建樓顏曰麗譙制甚宏敞復不戒於火寢堂後有方池

跨以飛梁其內為知縣宅左右為僚佐宅西南為吏舍

規制軒敞他縣莫及也十九年知縣張秉壺於門之內

造牧愛坊及倭寇入犯廳宇悉燼三十三年寇稍平知

縣劉克學重葺凡堂廡寢室庫獄廬舍公私咸一新之

而賓館神祠則增置於知縣黃文煒後同知鄭復亨來

署縣事又於門外建三坊南曰海甸雄邑東曰撫綏西曰明弼知縣鄧炳開西馬道與東相稱萬曆間知縣許汝魁立戒石亭親民坊於門內知縣李繼周重建內衙廳事及丞尉以下衙宇改造獄舍知縣徐日久建可堂於中廳之右知縣呂濬重修縣治改建縣門設榜廊於左右易民居餘地恢廓弘敞建東西二坊曰潔愛廉平

本朝順治中知縣涂贊加繕葺焉

元建縣治記 上海縣襟海帶江舟車輳集故昔有市舶有榷場有酒庫有軍隘官署儒塾佛宮儒館昨厘賈肆鱗次而櫛比實華亭東北一巨鎮也至元壬辰春以華亭地大民衆難理命分高昌長人北亭海隅新江五鄉凡二十六保立縣上海因以名隸松江府從參政黃公之請也領戶六萬四千有畸歲計糧十有二萬餘石

酒醋課程中統鈔一千九百餘定初三王簿郝將任首卜解蒞事惟舊榷場廳宇向為鎮守總管府運糧千石所庭宇湫隘藏牘無皮繫囚無固大德戊戌秋方議遷十月適有併海船舶歸四明之命衙宇空閒請於省府已亥剗下俾移置廳堂兩廡較舊衙倍寬而在在闕漏大費補苴且時值風雨交作海潮涌怒沉廬漂屋渺瀰一壑縣庭僅撐立而日靡寧居今達魯花赤雅哈雅忠顯捐已資為舉首尹夏承務丞范從仕簿侯將任交贊以和邑里富室裒金樂助委司吏姜濟董之以責其成勦譙樓三間二戶四窻門於下以謹出入鼓於上以報更點面樓而井於東西環井而樹其前後葺琴堂之陋持吏舍之推儼神祠之飾完園扉之關使聽訟有庭宴息有堂禱祀有祠曹掾有舍徽纒有圍經始於壬寅正月既望閱六旬訖事無靡公藏無勞民力治與縣稱縣與郡稱既成來謁記時措從而告之曰樓非徒麗譙也必思更鼓分明無媿乎萍鄉井非徒綆汲也必思變苦為甘無慚乎虞城樹非娛盼神蔽陽來吹而已也必思植桃如河陽種柳如彭澤使居人愛之如甘棠不忘之如角弓可也大德癸卯三月吉日唐時措誤

明知縣彭長宜署中元日詩 玉宸遙祝拜衣冠雨浥
庭階帶曉寒七日尚遲梅送臘半年惟伴柳居官驚心
世事顏初減高目征輪淚暗彈猶
喜條風吹海內青郊不礙戴星看

舊縣尉廳

縣治東三十步

儒學在縣治東

詳見學校志

巡檢司三

詳見兵防志

水次濟農二倉

詳見倉廩志

陰陽學在正陽道院

醫學在縣南明洪武十七年訓科姚士昂建

僧會司在積善寺

道會司在松江道院

申明亭二十六明洪武二年建

旌善亭二十六明洪武十五年建

巡撫行臺在縣治東北明弘治十三年知縣郭經改建

明重建行臺記

松江上海縣重建都憲行臺成巡撫

左副都御史彭公彥恭行部至止落之題其廳事曰正大公平燕寢曰敬畏既而知府劉君琬知縣郭經請磨石勒文以紀其事公曰然紀事之文必屬之太史氏以予嘗為史官乃俾來請謹按行臺在縣治東北一里許有川曰方浜浜之陽厥地爽塏厥向離明陌路橫亘於前石梁翼其左右其為巡撫重臣蒞官行法之所久矣門垣堂廡日就頽弊非所以嚴憲度肅具瞻知縣經欲圖興造以其事申之於府以達之都憲既得請乃商工度材會計公帑之羨可以給費者申請以從事諏日興作悉撤其舊而新之前廳後寢各五間寢之後有亭假山花竹列置左右寢之前為穿堂二間以屬于廳廳之前為軒三間以臨於庭庭之外甬道南出為儀門三間儀門之內廳寢之側左右廂廡凡數十間則吏牘之

所棲從隸之所憇庖湍之所在也儀門之南爲外門五
間門之左右翼之垣墻折而東西以周于北凡一百二
十餘丈外門之前爲綽楔門三間榜曰都憲行臺又爲
坊門於路之東西東曰綱紀西曰旬宣所以嚴憲度肅
具瞻者無不備矣作於弘治十三年正月成於其年之
六月凡用帑羨白金六百五十餘兩民知趨事赴工而
不知費之所從出也予嘗讀周禮御史掌邦國都鄙之
治法凡治者受法令焉秦漢以來則有御史大夫及中
丞中丞之職總領州郡奏事課第諸刺史察舉非法今
之巡撫其職無以異也南畿列郡聖祖創業所基國家
財賦所出巡撫之任必極一時之選若周文襄公三原
王公者其政聲風采猶可想見彭公之爲政知正大公
平之體而又持之以敬畏大書而昭揭之旣以勵已亦
以勵後來繼今者其志可尙矣南京吏部侍郎四明楊
守陞

記

察院在縣學東明洪武四年知縣張譽建弘治十三年知
縣郭經重新之萬曆三十六年廳事爲水災所壞知縣

李繼周重建

府館在縣西北城隍廟之右

其地卽舊上海驛
今人猶稱館驛

海防廳在縣治西明嘉靖間因倭亂特設海防同知羅拱

辰建其東有鎮遠樓北有截蜃樓

僉事董邦
政有記

本朝順治十七年復議以金山同知移駐上海十八年同

知田元愷始以館驛爲公署在縣西北城隍廟之右

總練廳在城隍廟之東

演武場在北門外

舊在積善寺前明正德九年知縣黃希
英建嘉靖四十二年遷于此今因之

養濟院在縣西南明洪武七年府同知程奉議建永樂十

四年毀王簿顧斌重建成化間知縣李葵弘治間知縣

董鑰前後增建共為屋三十間嘉靖元年知縣鄭洛書
重修萬曆間移于海防道西今仍其舊

明重修養院記 嘉靖元年七月廿有四日疾風甚雨
越明日一晝夜乃止災連南畿西浙數千里間上洋海
隴邑無完屋養濟院毀鰥寡孤獨笑在疚令蒲陽鄭
洛書憂之即其月之晦募義鳩材扶傾起廢乃及孟冬
初吉門堂廊舍翼然一新矣既以為喜然亦安得大履
萬間盡庇天下窮民而又不能無慨歎於斯也三年正
月薄紀其事命鐫之
石知縣鄭洛書撰

舊有市舶司

宋建今為縣治

安撫司酒庫

在縣市坊浜北福會坊內宋建元改為稅司

酒坊

亦宋建在青龍酒坊橋側賦云以三鄉之折糶為一邑之釀本三鄉即今新江海隅北亭也

上海務

即酒庫地

青龍務

蟠龍務

蘆子務

北橋務

縣市稅課局

明吳元年建在益度橋北後遷于儒學后嘉靖三十三年革

新涇稅課局

明吳元年建後遷唐行鎮仍名新涇後分隸青浦隆慶元年革

烏泥涇稅課局

明洪武六年建嘉靖三十三年革

按縣治有善治亭

在縣側元建

施水亭

在縣西

清節亭

在縣治宋咸淳中董楷提舉市舶時捐俸作人服其廉以是名之

古修堂

在舊文昌祠後

受福亭

舊市舶司西北

受福亭記 咸淳五年八月楷奉命船司既逾二載自念鈍愚於市民無毫髮補益乃痛節浮費市木於海舟陶埴於江濱自船司右趨北建拱辰坊盡拱辰坊初益慶橋橋南鑿井築亭名曰受福前曠土悉繡以磚為一市闌闔之所其東舊有橋已圯巨濤浸藹且迫建橋對峙曰回瀾橋又北為上海酒庫建福惠坊迤西為文昌宮建文昌坊文昌本塗泥槩施新甃文昌坊又北建致民坊盡致民坊市民議徙神祠為改建橋曰福謙由福謙趨齊昌寺臣子於茲頌萬壽廣承滋液施及群動改建橋曰泳飛橋之壽不能三十歲雖無述可也亭之壽以百歲計井之壽以千歲計詎可無述也人非水火不生活水於五行最先聖人觀象立卦取巽木入坎水之義名之曰井井以養為利以汲為功故王明則受其福用汲之驗也念陽明當宁俊又在列郡縣之吏各稱乃職有勿幕之吉無不食之惻源泉勿滴溥及懷生漱耳飲芳兆蒙嘉祉咸遂厥宇誰之賜也因刻諸石示爾民且使來者有考焉

絃歌深處

在縣廳後天順中知縣李紋建訓導江震有記

時雨軒

在縣治後成化壬辰旱知縣王崇之與邑縉紳會於軒而雨適至因名編修喬維翰為之序

留鶴臺

在縣寢堂後明嘉靖初知縣鄭洛書臨行留鶴于此故名

君子軒

圖政軒

明上海縣新作二軒記畧 縣有二軒名其一曰君子又名其一日圖政潘子未達曹子曰君子者以立體也圖政者以致用也潘子曰然然而立體者存乎德矣致用者存乎心矣今夫政慮之于心宣之于庭達之于里間其政良民乃休焉安之悅之詠歌之其政弗良民咸戚焉畏之惡之相與謗厲之是故政之臧否斯民休戚從違係焉耳矣其機本諸心是故古之君子以已觀民民憂亦憂民樂亦樂故能通其政于一身達其愛于下澤被當時聲施後世今天下之民力莫竭于松矣民之困莫甚于賦矣子之視之也其有所隱于心矣其思所以利之也乎曹子曰然固名軒之義也邑人潘恩撰

觀瀾亭 在坊浜上俗名接官亭

青浦縣治古唐行鎮也明嘉靖二十一年始立縣治青龍鎮旋罷之萬曆元年復置縣卜遷今治撤青龍舊廨益而新之繚以周垣中為廳事鑾駕庫在其右後為架閣庫六曹吏治事于兩廡前為儀門祠土神于其左作迎賓館于其右又前為大門作譙樓于上其外左右為申明旌善二亭廳事後為退食堂堂右為庫左為書房後為知縣宅宅左為縣丞衙右為主簿衙典史衙在丞衙之南置獄于西廡外當簿宅之南其前後及尉衙前共為吏解五區東南隅為總舖皆知縣石繼芳所規畫也

自後令長相繼增飾遂稱望邑

本朝仍之順治中知縣王嶙婁維嵩先後繕修


儒學在縣治東南 詳見學校志

巡檢司二 詳見兵防志

太平濟農二倉 詳見倉廩志

察院在縣治西南 自舊縣移建

明青浦舊縣察院記 嘉靖壬寅冬詔作青浦縣於松江府治之東北巡按監察御史候官舒公汀率羣吏經營之有成議矣會以代去明年春莆田周公持斧繼主喟然言曰松為里千四百有奇而屬邑維二聖天子以為難理作茲新邑蓋所以為民甚厚而吾屬將順焉者一有不至責其可辭乃進郡守順德何侯繼之推官莆田黃君洪毘計費所出已則俾攝華亭事通判內江張君叔宣知上海縣莆田張君秉壺督其丞狄希明等為



之閱四月邑有廨學有宮巡察有院神有祠民有廬室
蓋訖工之速前此未之聞而民未始告勞也於是何侯
請予記察院之成刻之石維國家置御史寄之耳目委
之風紀其在於內於事無不得言其按於外於政無不
得問故其官曰監察其所居之署曰察院則察固御史
職也然予聞之察一也而用之有善有不善善則爲明
爲審而天下之治由之以成不善則爲苛爲伺而天下
之事因之以僨在易泰之九二曰包荒用馮河不遐遺
朋亡夫九二以剛中之德當交泰之會其於誅賞興革
固宜肆其力爲之而顧有取於包荒何也人之才或長
於彼而短於此而隨俗習非亦或不幸而入於過如是
而欲盡棄焉則有乏才之憂政或不宜於古而宜於今
亦或人以爲不便而課其利害則猶利多而害少而吾
思所以易之者又未見其果勝如是而欲遽變焉則有
滋弊之歎夫惟君子智足以知其然而量足以容之故
其智爲光大其道得尚於中行而泰之治成焉斯古善
用察者也今天下患在議論多而成功少夫其議論多
也亦以用察之義不明敢於訾人而輕於變法是故易
言之及臨事而乏才則旋取其棄者畀之以位而不知
乍進乍退人將無固志以盡其能法立而弊滋則繼焉

者必矯之以由舊而不知一革一復之際民已不勝其
擾無怪乎成功之寡覩也公之爲是院也亦嘗思所以
爲察者乎頃予見公語法必原夫情語古必詢諸俗其
爲政不爲簾視壁聽而奸自無所容不喜爲紛更而調
停補葺民實陰受其賜蓋今善用察無如公者嗚呼後
之君子居公之室因以紹公之政則斯民之幸而於公
亦不負矣公名亮字某嘉靖壬辰進士何侯丙戌
進士廉靜豈弟與公志相合故請予記者侯云

皇華亭在北門外爲駐節送迎之所

總練廳在儒學西二陸祠之內

演武場在北門外

養濟院在西門內

舊有青龍官廨

新涇稅課局

舊屬上海初建縣時分
隸嘉靖三十三年革

松江府志
卷之十一
三十三
唐行鎮倉

即今太平倉 以上所載皆建縣時分隸其舊屬華亭上海前已廢革者不復重見

金山衛治明洪武十九年開設二十年指揮僉事李武建

天順弘治間指揮西寧備倭都指揮王憲陳蕃相繼繕

理經歷司在東鎮撫司在西軍器局在衛之西廣寧倉

在北公館察院帥府在南演武場在東門之外有演武

廳其左右前後四千戶所及百戶各有廳事帥府即福

建都司王勝舊址正統初建特設叅將一員

本朝因之遂為叅將府焉

籌邊亭在金山衛治南明都督董良備倭時建華亭知

縣戴冕為之記

青村中前千戶所明洪武二十年千戶駱聚建內有千百

戶所演武場在南門外有演武廳廳後有架閣庫西有

廣積倉永樂八年副千戶陳真復建軍器局

南滙中後千戶所明洪武二十年千戶陳盟建內有千百

戶所演武場倉局三十年副千戶陳斌張敏重修萬曆

間復設把總一員有把總司

柘林左右營二千戶所舊設把總司規制大畧同南滙

川沙守堡千戶所及把總司嘉靖三十六年巡撫趙忻巡

按尚維持兵備熊桴題設從監生喬鏗請也內有百戶

所軍器庫撫按行臺鐘鼓樓社學城隍廟旗纛廟

之射以觀德也文武之道在焉射圃次之古鄉飲酒禮賓典禮也與今異矣今似乎養老而兼讀法也鄉飲酒次之非田無以養也蓋有虞氏之米廩矣學田次之古之有道有德者祀於瞽宗名宦鄉賢次之宋有山長制昉於白鹿洞義塾者二十五家之間也雖廢而可稽社學書院義塾次之皆古之制也非古者則附見焉賢有功者不得祀於瞽宗人或私祀之故祠堂附焉文昌者斗之戴筐六星也將星也刑星也非文星也與梓潼神皆不載於宗伯之祀典而學者多敬事神而明之不可度思奎主文府非斗魁也祠之者或又一說矣文昌祠

魁星樓附焉凡此者咸以類舉而係之以時又分係之以地云

松江府學

松江府學在集儒門西梯雲橋之北儒林坊南舊華亭縣學也宋初宣聖廟介於梵刹天禧初知縣事劉唯一始遷於縣東時學舍猶未立

天禧二年重修至聖文宣王廟記畧 華亭縣者嘉禾郡之劇邑也當土敞木煩之地屬風頽俗雜之餘民無堅正之心世尚剽狡之氣淫神以要其福佞佛以逃其禍先王之教咸罔聞知廟貌之靈宜夫委頓自錢氏納土宋運有開年曆寢深邑長相繼殊未思政理以五常為本五常由夫子而明必有所宗是宜崇祀率視如弁髦之敝孰能存愛樹之心介于梵刹之隅甚矣鄭門之困今天子明神所勞禋享聿修典冊攸存牲幣靡闕而

元祐五年夏四月左宣德郎知秀州
華亭縣事劉侯視事三日謁先聖廟顧新學有左廡而
闕右廡垣墉不立環視傍徨歸則發政以惠民徐以善
言風諭邑內邑內欣善莫不奔走以承命於是學始繕
完乃屬其佐劉發爲之記且曰新學之建吾無與也必
爲記不忘前人之功爾劉侯之意固厚矣而事在人之
耳目非可誣也輒廣記而備言之華亭大縣也旁小縣
皆有學獨華亭無之蓋浙西善事佛而華亭尤甚民有
羨餘率盡以施浮屠先聖廟則湫隘卑陋自吳侯爲宰
嘗有意遷易後三十年而陳侯謚復議建學是時邑人
衛公佐獻地建殿築士治木會陳侯以事去議又罷久
之浮屠氏從公佐乞所治材爲佛宇公佐曰此材可朽
腐不可移用公佐死浮屠氏又從其子弟求材其子弟
固執如公佐之意於是邑子朱賡朱伯夔周揚許洙以
之于陶侯鎔陶侯白州郡監司擇日鳩工而四人實董
其役邑人鮮助成其事者故積久而成於劉侯蓋若有

元豐七年甲子知縣事陳謚始議興學縣人衛公佐公望

獻縣之東南地且任禮殿之役工未興而公佐卒歷知縣

事陶鎔劉鵬始克就緒

元祐建學記畧
元祐五年夏四月左宣德郎知秀州
華亭縣事劉侯視事三日謁先聖廟顧新學有左廡而
闕右廡垣墉不立環視傍徨歸則發政以惠民徐以善
言風諭邑內邑內欣善莫不奔走以承命於是學始繕
完乃屬其佐劉發爲之記且曰新學之建吾無與也必
爲記不忘前人之功爾劉侯之意固厚矣而事在人之
耳目非可誣也輒廣記而備言之華亭大縣也旁小縣
皆有學獨華亭無之蓋浙西善事佛而華亭尤甚民有
羨餘率盡以施浮屠先聖廟則湫隘卑陋自吳侯爲宰
嘗有意遷易後三十年而陳侯謚復議建學是時邑人
衛公佐獻地建殿築士治木會陳侯以事去議又罷久
之浮屠氏從公佐乞所治材爲佛宇公佐曰此材可朽
腐不可移用公佐死浮屠氏又從其子弟求材其子弟
固執如公佐之意於是邑子朱賡朱伯夔周揚許洙以
之于陶侯鎔陶侯白州郡監司擇日鳩工而四人實董
其役邑人鮮助成其事者故積久而成於劉侯蓋若有

待焉夫致治必先學校學士大夫方困布衣必執是說及其入官則背之果何以哉蓋上之人所程督者常在獄訟簿書而攷績不急於教化故也以文盛之時建學於多士之地或有其意而不能遂其議或遂其議而不能致其事或致其事而不能成其功故記其實以為上下之勸使後之觀者知成功如此之難無至於廢而不

治云劉發記

紹興中知華亭縣事楊壽亨周極侍其銓參政錢良臣知


縣事楊潛相繼修飭學舍始備其地則今魁星樓及射圃

是也

紹興十五年修學記畧 華亭于橋李為大邑其地東南濱海無崇山疊嶂坦然如砥數百里間異人間出宣和中舍法罷去重以兵革士非里選學閉空舍風揭雨穿日底催敢上下釋奠執事以胥史素木瓠葉何從觀禮紹興壬戌仲夏蜀邵楊侯出宰是邑下車以故事謁先聖於學慨然有必苴之志屬歲大旱三農廢銓艾者

十八方撫流亡之不暇越明年歲得中熟於是斥羨費鳩長材乘農隙飭工役經始於十四年之正月落成於是歲之杪春殿宇中巖蕭屏外壯講有堂居有舍齋宿有位賓謁有次帑廩庖饌簾帟器皿纖悉畢備其塑繪之新時朝廷初行鄉飲酒禮象而易之渠渠夏屋輪奐一新時朝廷初行鄉飲酒禮象而易之渠渠夏屋輪奐粉袍雲集按籍得舊贍學田三千畝歲入秬稻七百餘斛益以浮屋之租士食霈然昔唐韋景駿令於肥鄉學廬館舍皆所繕治他日過之兒曹悉至迎勞而以獲見為幸故景駿所以列於循吏者雖其治狀偉然蓋亦興學之有助也今侯秩滿歸朝諸君飽德求兼記之乃書其事左迪功郎縣尉主管學事延平廖兼謨

紹興二十九年修學記畧 華亭負海通江有魚鹽稻蟹之饒多富商大賈俗以浮侈相高不能力本業然衣冠之盛亦為江浙諸縣之最雖細家中人衣食纔足則喜教子弟以讀書為士四方之俊歷聘而來受業者雲集其中秀民才士往往起家為達官由是競勸於學居官者不必以擊斷鷙猛為治可以禮義馴服也往時長吏媮為一切以軍旅期會為急應辦調發銳於集事上下如束濕馴雅之風少衰紹興己卯長興周侯極來宰



是邦下車問風俗則曰固無所用斤斧也乃尊儒生禮賢雋一以文治之先教後罰故習盡革邑以無事顧瞻學宮垣墻圯漏弗穢不除經師倚席不講弟子散在黨巷則喟然曰吾邑多君子而學弊若此顧何以稱父兄之樂育廣師友之淵源即選於衆得才敏廉幹之士曰陸南者俾長諸生而會計焉籍贍學之田獲隱沒之租度廩給之餘悉取充費市材具募傭工正欽傾補罅漏築夷圯易朽蠹糲荒類達埋塞墁堊丹牖廊廡修潔庭戶明煥邑人鄭君雍復捐私帑設門戟翼以欄楯而夫子之宮儀制始備廟貌尊嚴過者肅容克昌惟老佛之教以崇飾塔廟為植福之本而富家巨室傾貲以助其靡今吾儒不然其宮室有數其械器有等不傷民財有補於世而為吾徒者反不能尊其書衛其道視庠序荒涼學徒解散為吏者則以力不暇給為託而不知崇儒尚賢為從政之良策也今周侯尊吾道不鄙夷其民而鄭君欣然附從真可使異端退聽儒術增氣然則周侯之于民鄭君之于弟可謂得為宰為父兄之道矣庚辰季冬朔左承事郎新差簽書奉國軍節度判官廳公事許克昌撰

嘉泰中知華亭縣事錢閻修學宮

紹熙五年修學記畧 學校為育材之地近代從政者困於簿書期會急於財貨源流至於黷宇之簡陋眎歆弗支見漏弗補因循苟簡以延歲月雲間之學歲在甲子鼎新于蜀郡楊公壽亨規撫亦具體而微閱時滋久風雨震凌圯漫不振鄉參錢公復加營繕厥後新者逾壯者陋未聞以葺治為言余眎事是邦末年始與學長黃縱謀書去蠹易堅補罅且漏繪贖從新經始于癸丑嘉平訖事於甲寅仲春自是堂可以講齋可以誦室可以寢步趨有廊廡膳羞有厨傳槩之舊觀為差勝余所以期待諸生者蓋不敢不勉置門籍以司出入限齋宿以糾勤惰甚者慮廩給之不繼罷濫竽之員鑄與釜之粟亦既三載于茲教養之心未始少忘而作成之効竊有望焉紹熙甲寅季春朔奉議郎知秀州華亭縣主管勸農事兼兵馬都監兼鹽場主管堰事借緝楊潛記

嘉泰三年修學記畧

溧陽錢君為縣之明年慨念鄉校廢久不治煥新堂宇修飾齋廡几席具設庖廩整辦合試鄉邑人士充弟子員推簡貢士次補職秩蓋不獨課試文藝學政大畧可睹已華亭之學甲於諸縣往時

士風之盛不止以文章第大常魁多士蓋至於學行淑鄉里事業在政府仗節不屈于疆敵擾攘之際爭新法而盤樂於擯斥者可數也嗚呼士有廢於因循習有安於偷懦三二十年來鄉之善士退學於家塾長吏亦視為迂緩不切之務豈國家所以建學之意歟至生長鄉里進不能盡見前輩之風流退而求益於學校未能也竊聞之問學之道而規矩之守氣質之養而德性之充過失相規而道義相勉長者有述而少者知敬使風化感於鄉閭而禮遜洽於田野則為學其庶幾乎令尹能體國家之意矣凡游於學者其亦知所勉耶君名閻字子言寄理修職郎林至記

開禧間知華亭縣事汪立中始於學宮行序拜禮

開禧二年學宮序拜禮記畧 雲間士藪澤顧有因陋未遑革者歲元日至相與會拜浮屠之宮開禧二年汪侯來蒞茲邑或以是告侯慨然曰齒尚於鄉倫明於學古也吾里人講是禮于州校雖異爵者率序以齒傲而行可乎翼日薦紳冠帶總集黌宇序立大成殿下潔豆邊釋菜俾士之高年者主祀事禮竟循廡而陞布席進

德堂相鄉而拜少長從其次子弟則列父兄後魚貫雁行閭閻雅雅侯與僚佐盛服觀禮嗣歲之二日亦如之邑子諸生退而合謀曰是其可不書尊師蒞儀敬也示化嫩俗仁也貴老順長義也一舉而三善具侯誠知治本歟林卿昨典番學聞范文正公出守時政用名教厚俗為先後進于長者修慶朔之拜惟謹侯今小試一邑心惟范公是師諸父兄弟盍世守之以毋忘鄒魯是邦之意侯名立中嘗舉外臺進士今通朝籍假五品服云

胡林卿記

端平三年丙申知華亭縣事楊瑾以學舍庠陋度地鼎新

之始遷於今所 按後建學碑陰記買地舊學之南二十三畝又按石刻紹熙中公文學前有射圃白

地一片東至河西至陳宅及浜南徹通行街初知縣事楊

潛改講堂為明倫堂闢齋五曰居仁由義隆禮育才養性

講堂者舊名進德堂至是又改明倫堂曰明善併齋為四

日體仁集義志道進德是時縉紳助費者提舉錢仲虎而
下百二十有八人具載碑陰及學田房廊邸店等瑾悉鑿
諸石以記至今存焉

端平三年重建學記畧 華亭故有先聖廟慶曆後郡
縣皆有學於是縣立學宮以附於廟紹興紹熙雖加繕
治然既數十年矣今令會稽楊君瑾始至振乏逮蘇東
姦摘隱一年而搏節浮蠹儲米三千石為平糴倉又一
年度地鳩材遷大成殿前門後閣左右二廡而館鄉賢
於夾又東甃泮水建講堂一齋廬八令佐之款謁有次
諸生之養有廩通為垣以宮之翼翼沉沉遂嚴靖深侔
來以圖請記成事予惟論學校者未有不傷教法之壞
議科舉者未有不歎詞章之靡經生學士尚論比閭之
法庠塾之教則悼王制之不可復嗚呼侯封井牧去籍
二千年矣是未可以驟復也自鄉治廢而民散朝夕無
間塾之教歲時無庠序之屬死徙不相知出入不相友
緩急不相賙而為民父母者沈于簿書期會救過不贖
於是姦胥亂民緣絕為欺吏以官為市民與吏為讐違

其常心以陷于辟今之民豈誠不古若哉况吳中人物
之盛魏晉而後彬彬輩出虞魏之昆顧陸之裔居華亭
者為尤著其地負海枕江平疇沃野生民之資用饒衍
得以畢力故士奮于學民興于仁代生人材以給時須
乃自近歲遽以華亭為不易治令不具官胥橫民肆簿
書漫漶獄訟繁滋銓曹註擬往往有望望然去之者吁
何至是哉記曰凡釋奠者必有合也或謂合他國之先
賢而祀之然則是邦有如宣公自可謂人物之標準地
靈人傑千古不磨作而與之則非守令事邪唐人詩稱
敬輿為縣人而志不書其何以為刑化善俗之助楊君
建學之初揭堂曰明善合思孟相傳之旨與諸生發明
冠珮林立聽者皆竦上以誠感下以誠應矣予既嘉楊
君之為又嘆敬輿鍾美是邦而人未之或知故表而出
之其自今父詔師傳斯游斯息玩聖賢之所學何事以
無志賢令尹之德安知如敬輿者不數數遇也九月壬
戌資政殿學士通議大夫提舉臨安府洞霄宮臨印郡
開國侯食邑一千五百戶
實封三百戶魏了翁記

淳祐六年丙午知華亭縣事施退翁重建講堂改作齋廬

中置詠仁亭後爲觀願堂作小學於齋後重立狀元坊於學東

淳祐六年增修學記畧 古者王畿千里六鄉之內無非教者自二十五家之間必有塾山家而黨由黨而術無人之不學施君退翁家山陰而仕華亭其在扶馮猶六鄉也上而道達德意下而考其德行道藝非夫人之責而誰歟國家建都吳會踰百年矣而華亭之爲縣公卿將相由此而出不減王畿之盛而求其人物挺然若尹吉甫之詠歌于詩劉康公之談道于春秋鮮有聞者由夫小學之教不行於童授之時大學之道不立於成人之後故也縣故有學早隘不稱端平間楊金部墜因其地而闢之魏鶴山爲之記然猶以地迫而陋不及增廣以待後人施君治化修明民安其政既庶而教不能不以鄭校魯宮爲疑君曰吾之職也因米廩餘積而裁度補助之周墉五十丈左右前後四面而立芟薙其藁蕪增益其沮洳昔行其右今左爲涂內立講堂後爲之軒兩廡對峙四齋並立後建小學三楹工役材植悉依市直七月告成毫髮無侵於民朋來友習相觀而善教

養之道於是乎備記其本末以詔方來端平日萃文閣直學士中大夫提舉江州太平興國宮食邑五百戶賜紫金魚袋王遂撰弁書

元至元十四年縣陞爲府因爲府學元貞初復行貢舉知府張之翰卽魁星樓故址作新堂因以貢舉名之

元貞元年貢舉堂記畧 聖上嗣登大寶之初詔天下議行貢舉適松江郡學魁星樓基新堂成之翰因以貢舉名夫貢舉之設始于隋盛於唐實賓興之遺意國家崇尚儒術自戊戌一試後時相梗其議而止今天語丁寧以人材爲第一義雖鄉舉里選未易復如明經如安得齟齬於其間松江古華亭凡陸鄉之英顧黨之秀及隣境之俊異有能體朝廷之意振學校之風游于斯聚於斯使斯文不絕是知樓亡而堂堂中之星亦未嘗不耀也正月望日朝列大夫松江府知府兼勸農事張之翰

皇慶初江南諸道行御史臺檄榜講堂曰明倫齋曰進德

育才守中常德

堂榜紹興中楊潛所刻朱文公書

二年癸丑知府申杲重

修講堂

重修講堂記畧 真定申侯守松江之明年癸丑百廢具舉而學為先學之修而講堂為大堂作於宋端平間今八十年扶傾支危震陵且壓于是梁柱榱桷之腐瓦甍戶牖之圯一皆新之高明覩深規制頓復縉紳折旋其中藹然崇化善俗之意侯既報政還朝吾黨之登斯堂也撫遺蹟而重去思時相茲役者教授嘉興沈德華亦代去乃謀于今教授薛鈇請為之記璠惟斯學唐陸宣公實生于此建學立師國家教育之盛夫豈月講季試而已哉據案而誦成說曷若疑難荅問之為益餽名而校藝曷若課其功而訂正之為警切篤實光輝必有副作成之望者而璠不足以發之延祐七年十月前寧國路儒學教授龔璠記

延祐中知府汪從善始備大成之樂

歷攷祀聖之樂代有異同要夫樂以昭德非大成之樂不足以祀至聖自漢及唐雜用樂章且未頒之州郡學校至宋徽宗大觀三年更撰釋奠文宣王樂章頒布天下高宗紹興十四年以祀文宣王大成樂舞頒降肄習元成宗大德十年命江浙行省備宣聖廟樂秋八月用於廟祀又令翰林撰樂章然因循未用明洪武十七年六月辛巳命部詳議大成樂令製樂器頒行天下學校俾諸生習之以祀孔子二十六年頒大成樂器于天下府學令州縣如府式松郡學之修建屢矣獨汪侯脩大成之樂以光祀典可謂得崇聖尊德之本矣因并攷之

以俟後之採擇焉

至正二年壬午達魯花赤哈只以廟承邑舊拓其址而新之

至正三年重建廟學記畧 松江在唐爲華亭縣古初州縣未有學長吏循故事廟祀孔子而已慶曆中立學之詔下而華亭久莫克應元祐間學乃粗備自是繕葺之功弗輟端平末又稍治而大之逮皇朝奄有南土凡五萬戶之縣悉置爲州惟華亭戶數增至二十三萬特建散府曰松江而仍以華亭爲縣隸焉守貳之儀章命秩與夫居處之崇擬于大郡學雖設教授員而禮講堂齋廬門廡率皆屬邑之舊因陋就簡閱六十年無所改作領郡寄者以牒訴之繁租賦之厚關決趣辦日不暇給未遑庠序之事也今達魯花赤哈只亞中公下車伊始欵謁學官觀其位置褊迫規模庳下慨然而嘆以爲分符出守視古諸侯承流宣化莫先學政頽宮之制闕而弗講非所以嚴國典重教基也盍撤而新之遂發已帑以倡民感而相謂曰向吾罷于役者必事購請而

後獲紆今公紆吾力不覲吾酬茲又大建學宮吾視竭力以事購寧若樂吾助而且得嘉名哉乃爭持羨貲以授司計者前後共七萬五千緡有奇教授林聖子亦輟學廩來助於是材斲旣具工徒旣集乃徙藏書閣陸氏三賢祠于北以拓其故址中建先聖殿傍列兩廡前闢三門崇高修廣加其舊三之一亞中公能以義起禮汲焉舍舊圖新而務求合乎諸侯頽宮之制可謂有志于古矣是邦之望如顧陸諸賢代不乏人土之游息于斯者苟無忘公之德與公所以建學之意而以古道自期將見學修于家行孚于鄉蔚爲三代人物奚止如昔之望而已哉癸未秋八月奉政大夫前浙江等處儒學提舉黃晉記

五年乙酉知府王至和始製執事者冠服

唐帽白涼衫黑角束帶

十年庚寅教授倪駿復新學舍撤廟門易以石

至正十年修起堂齋記畧 松江舊華亭縣國朝陞府而學俱焉學制殊陋至正癸未前監府哈只侯改觀先聖先師廟庭而堂宇未遑也學之廩歲收幾二千石春秋朔望祠祀師生月給暨泛應之費歲支不越強半廿

學校上

餘年來職教司計者視學廩為已私瓜分所贏不足又稱貸以遺來患學校遂大廢至正己丑吳興倪君駿來職是教悼舊弊而新是圖適監府荅禮麻侯太守王克敏侯皆被守令選來掌郡治同知拜住間侯由監學釋褐來佐郡治咸知教為政本慨然也頁以興學為已任倪知事幾之克成乃節浮費畜所贏是冬得米若干石錢若干緡越明年白郡侯為修起計侯相與輟俸來助大撤舊觀而廓之及秋堂成高明宏邃繼而門廳齋廬咸與維新舊存若觀願堂者無幾餘已侯方燕客而落之于是同舍之士相慶而詣居仁曰願紀其實居仁謂曰治亂之幾係乎學學校之幾存乎人自郡縣有學循吏之能典修者文翁而下若鮑德趙恂衛颯景恭之為內史常袞之為觀察李栖筠倪若水之為刺史教官能修其職者唐趙德宋胡安定一二而已豈易得哉今吾郡侯咸被重選有古循吏風教官自湖學來得安定遺則以賢師儒遇郡循吏宜吾鄉校之興勃然也鸞旂戾止小大畢從載色載笑以在泮為心者郡侯之所以倡其教也樂育菁莪尊賢耆艾詩書禮樂以作人為心者師儒之所以任其教也異時閭巷弦歌孩提俎豆化貪暴為廉讓之風易澆偽為忠厚之俗當是時吾黨之士

又將何如以為慶刑因為之記郡老生陸居仁記

十五年乙未知府崔思誠改觀願堂為養賢始範金為祭

器器皆精好迄今用之近為官者易以新鑄所有無幾矣

十六年丙申苗軍亂縱火焚學訓導胡存道死之賊乃舍

去十九年己亥同知顧遜重修學宮改大小學齋為五經

齋作貢士堂於學南又作燕居堂於學北

至正二十一年重修廟學記畧 松江禹貢三江之一引湖注海環絡數百里府治在江之東南南學在府治之東南北歲兵興殘燬無幾貳守昭陽顧侯遜既視事慨然躬其任而判官海陵蔣君仁傑實佐之時則通川高君志道以選為教授條白于府是孚是宜銳意籌度殫智繕營乃重修大成殿藏書閣內則東西二廡明倫養賢二堂外則重門及教授廳事葺罅漏易朽撓垣湯剝飾而新之中唐階城鉅以甃石墻亦如之增造廩庖作

釋奠禮器雅樂徵樂師以教生徒改大小學二齋置五
 經齋聘專經之師五人以分授之廣弟子員至百五十
 延名士為賓友者三十五人執禮者二十五人肄樂者
 三十八人皆月廩餼之有差既又重建貢士堂於學宮
 之南顏以賓興西湖書院廢為城基舊有宣聖燕居像
 無所歸則作燕居書堂於學宮之北以奉之二俊堂者
 為陸氏機雲作也堂廢已久記石尚存則作二俊堂于
 書閣之北以存其舊凡祀教器物之品式無不修具遐
 邇瞻趣士民稱歎先是學田歲入米三千一百五十七
 石是年受姚士獻田入米一千五十二石歲計米為石
 者四千二百有九懲革宿弊簿責有司科實其數以故
 有猷有為不日而成非貳守之明達果敏學識有素詎
 能興復若是耶今四郊多壘角逐功利貳守不遑他務
 而獨汲汲於是漢文翁修起學宮於蜀而治比齊魯宋
 安定胡先生立師道於湖學而人材輩出矧松江於湖
 為隣流風餘韻猶有存者師弟子員相觀而善將見浙
 水之西漸復古道自松江始予老矣它日執經升堂尚
 能為諸君子言之浙江等處行中書省左丞番陽周伯
 琦記

大成殿後故有藏書閣至正二十四年甲辰知府王立中

購求十三經等書藏於閣中

至正二十五年藏書閣記畧 荒陬之地書有不能盡
 致而婁人之子書有不能盡讀 一旦而措諸事業有弗
 病且餒乎松江儒學僅全於焚蕩之餘所儲經史子集
 散佚無存者至正二十三年冬西蜀王公立中來守是
 邦知事海陵徐君克初贊其理汲汲以興學校為首務
 時則會稽馮君恕錢唐陶君植相繼掌教延五經師迪
 弟子員月試季考士習一新復以學廩若干石購求十
 三經註疏等書于中吳巨姓家積收皮列書閣之書粗
 備戒司籍慎於所守有欲假者許就觀焉以其得之不
 易命闕列叙總若干卷志其歲月於石寶之於後非特
 一時而已其能繼而益之以至萬卷實有
 望於來者固不止於是也 樵李貝闕誤

明洪武二年己酉詔天下興學校

洪武二年詔開設學校生員額四十名以禮律書為一
 科樂射筭為一科散在四齋設教授一員訓導四員縣

置二齋額二十名設教諭一員訓導二員其生員有成者貢中書省考驗十五年始撥賜學糧降印置學吏其訓導以明經史者充之十七年甲子開鄉試乙丑禮部會試中式者廷試賜進士三甲二十五名訓導始從吏部注授有冠帶二十七年始定生員衣巾制其巾類古玉版巾後垂兩帶約長尺餘廣寸許以皂羅為之其衣藍色領袖邊幅並緣以皂布府廩膳生四十人增廣百餘人歲貢明經一人以年深者充三載一科赴應天府鄉試不限員數永樂十六年詔府州縣學生員有諳書算者悉送京師試事畢例入太學授以官宣德三年三月四日行在禮部節該欽奉敕諭學校之政所以立教必求實效欽此行移各處巡按監察御史會同布政司按察司及提調官教官將儒學見存及丁憂事故生員公同考試廩膳七年以上學無成效者發隣近布政司府州充吏鄙猥不堪無效者追徵食過糧米還官黜退為民增廣生員亦各額定名數在京府學不過六十名在外府學四十名州三十名縣二十名人民數少之處不拘此例正統元年言者請設風憲官專一提調學政禮部會議得除雲南貴州係邊徼生員數照例考試不銓官外合無于浙江等處按察司各添設僉事一員

南北直隸選除御史二員不理刑名等事專一提調學校仍俟三年六年九年考滿給由於是御史彭勗奉敕提調繼以孫鼎葉鑾尋停罷天順元年復設以御史嚴詮為之

宣德元年丙午巡撫大理寺卿胡槩即故教授廳址作崇

德堂知府黃子威作兩廡屬於講堂

宣德元年重建崇德堂記畧 宣德改元詔在廷重臣分巡天下輯寧遠邇江南直隸諸府密邇京畿在政化之所當先上嘗注意焉者故大理寺卿江右胡公承命而來是年夏五月駐節松江首舉學校之政至則謁先師廟集諸生於明倫堂講誦畢顧瞻左右廊宇圯毀前堂惟存遺址因訪諸師生郡博鄭典宗考舊典儀請復具制公允其請屬郡博董其役於是相率勸勉鳩材庀工作堂三間左右翼以夾室高爽軒豁視舊尤加越三月南昌黃公子威來知府事復加完葺次作東西步廊為間各十以趨堂廡輪奐一新氣象宏開莫不聳動瞻仰堂素未有名郡博復請于公公曰學校育賢才之地賢才之所務莫先于德行因題曰崇德蓋欲諸士知所

進修而崇廣德業也造就後學之意豈小補哉翰林院編修文林郎郡人楊珙記

正統五年庚申推官楊政改建藏書閣於養賢堂後更名曰尊經建神庫於閣之舊址以藏祭器是歲提學御史彭勗改五經齋為四日志道據德依仁游藝知府趙豫購經

史藏於閣中

正統五年重建尊經閣記畧松江府學舊有藏書閣永樂庚寅傾覆於颶風郡守趙侯豫節推楊侯政重建而新之既成顏曰尊經閣具書其始末來請記初趙侯以華亭縣學廟廡歲久傾側斯閣積廢乃謀營修復慮其費浩繁首捐已俸又勸富民出貲為助事將成有沮之者遂止楊侯曰此不可已白于巡撫侍郎巡按御史民犯輕罪或情可矜者從寬典以錢帛市材木瓦甃及工匠之費弁益以前民之所助者則廟閣之修工可立就僉曰可踰年而提調學校監察御史彭公勗至郡嘉楊侯之集理亦為之規畫既新縣學廟廡乃鼎新斯閣

高七丈有奇深六丈濶與深等壯觀輝麗登陟而四望湖山之繚繞原野之曠衍海天之澄明風景之勝舉在目前而楊侯不以遊觀為樂也乃取聖朝所頒經籍及歷代子史百氏之書寘其上又購書之未備者以益之簡帙充初故以尊經名閣自賦詩以紀其成焉其經始在正統二年秋四年冬興工而成則五年春之二月也國家昭宣文教崇用儒雅屢下興學之詔又置憲官分道專典學政惟欲才之有成以為世用松江為畿內大郡學官可使頽弊乎趙侯楊侯乃協心致力而成之能祇奉聖意矣然楊侯之聚書於是者何哉夫經以載道也子史集傳羽翼斯道者也士續經明道有得於已斯可以措之於用矧松江素稱多賢今之來游於學者必多秀偉之士也欲其明經博學出而施之者此楊侯之意安得不以記為重哉趙侯字定素北京畿甸人楊侯字惟敷吉水人禮部左侍郎兼翰林院侍讀學士國史總裁經筵官臨川王英記

六年辛酉增置號舍於閣之陰及學之西偏七年壬戌新戟門訓導江漢通判郭瑾作詠歸亭於玉帶河上為石闌

於學宮之前

亭與河橋及尊經閣先賢祠紫微巖半月池一鑑軒為學之八景

成化十七年辛丑知府王衡創游息所於魁星樓之東

尚書

錢溥工部主事宋瑛記

弘治元年戊申颶風壞學舍知府劉璟重修

教授魯璵記

正德四年己巳五年庚午連雨學舍遂大壞知府

陳威次第修舉學宮復新

時連歲大雨學宮盡圯知府陳威銳意典舉先修四齋建登雲

橋直文廟門建樂育坊于其南擬徙梯雲橋于學門之東復為橋于廟門西使行者不雜於坊內作外號作桂香桃浪二亭將以次一新雖餘工未訖而規模宏遠矣六年辛未知府喻時繼成之

正德九年重修府學記

正德己巳江南大水而松特甚越明年庚午水再至浸公私廬舍凡旬有五日而始

退學宮壞特甚又明年辛未夏內江喻侯時以才御史來守松當是時府庫無羨財侯乃搏節浮費殫竭心計至冬而後始事令於教授彭鍊即日鳩材募工因以役民之不能食者咸踴躍恐後會樂安詹君崇以進士來

推府事適被符攝令率亭以身任之百費有加事乃告集落成於甲戌歲之秋凡歷四載自大成殿明倫堂殿之東西廡堂之左右四齋尊經閣魁星樓崇德養賢堂鄉賢祠解署射圃櫺星門成德達材坊登雲橋皆還於舊維新有作者則仰高之坊冠於文廟云喻侯詹君同心一德以相後先贊之成者同知侯君自明孫君壘通判聶君瓚錢君貫參之者率亭縣丞趙才也史官陸深撰

嘉靖八年己丑知府熊宇建天藻亭以蔽御製敬一箴

嘉靖九年重修府學記

嘉靖庚寅冬松郡重修學宮

成初郡守善化熊侯宇奉部檄建亭于學之南以貯今上所著敬一箴承恩嘗過而瞻仰美其輪奐而學宮尚多頽缺未幾侯大議興作凡瓦甃木石之儲波委雲屬使縣丞吳徹董其事嘆曰侯其知務乎然昔在己卯亦嘗有事於修學承恩實執筆記其役曾未幾已頽缺若此斯則任事者之責也繼聞郡博南城程君癩躬自勤瘁務無苟且從事今茲之役庶乎其可久矣蓋八閱月而工始訖若文廟若兩廡若戟門若明倫崇德養賢堂若咏歸亭若齋廬若尊經閣魁星樓莫不一新至鄉賢

各宦祠昔皆位制弗稱亦相地改作陞級崇峻欄楯周直冊聖炳明於是程君揖承恩告曰是役也我侯作人之功不可以不記承恩退則為說以復於程君曰今皇懋德建中緝熙聖學敬一之箴發揮精詳得千古聖賢相傳心法既復有感於人才之不知敬學之本因廷臣之請命諸郡國悉以前箴刻置學宮俾為士者皆知為聖賢之學而不徒事無益之空言振作天下何其盛也諸士子亦嘗誦聖訓而有感乎則是役也所以本國家建學之意下推賢侯作興之心以為諸士告宜莫有大於此者故敢悉次其說願相策勵焉左春坊左中允承德郎孫承恩撰

嘉靖九年庚寅詔天下釐正文廟祀典改大成殿為先師

廟作啟聖祠

先師廟國初仍元舊稱大成至聖文宣王像用冕服其配哲從祀稱公侯伯有差皆有像殿曰大成至聖嘉靖時大學士張孚敬議易像以王改稱至聖先孔子四配稱先賢某子十哲七十二賢稱先賢稱各春秋以後

諸儒稱先儒稱名歲以春秋仲月上丁日致祭改殿曰先師廟啟聖祠追祀孔子父叔梁紇為啟聖公以先賢顏路氏曾皙氏伯魚氏孟孫氏配享從祀程珦蔡元定朱松至萬曆間用科議增祀周輔成焉丁日先祭啟聖而後祭孔子

萬曆七年巳卯知府閻邦寧修習釋奠禮樂

初洪武巳酉詔天下通祀孔子以春秋二仲上丁日行祭前期五日應行事等官散齋三日治事如故宿於正寢不判署刑殺文書決罰罪人致齋二日一日于廳事一日赴祠所宿諸生皆齋于學官前一日行事執事官集肄祀儀習讀祭文及眠幣行事於學之講堂及期陳設省饌獻爵奠幣飲福受胙望瘞各致嚴敬禮也顧相沿等為故事積漸廢弛萬曆間知府閻邦寧加意振舉凡籩豆簠簋及調諧音律教習樂舞至今井然

二十四年丙申知府詹思虞重修府學

萬曆二十四年重修府學記畧 先是聖廟左右有廡啟聖有宮尊經有閣崇德明倫有堂東西有齋省牲有

所義田有倉其圯者撤而更新之其角門之闕西北隅者塞之其敬一亭建於養賢堂之廢址而樹御製碑以實之其教授之公署及德齋與市囂雜處者內創于魁星樓之廢址徙而遠之固從博士諸縫掖請也其後又有聽于堪輿家仍舊之說則還教授之公署如故西北隅之角門如故魁星樓之遺址亦如故亦從博士諸縫掖請也夫諸生旋請而旋聽之旋又復請而旋又更徙之詹侯之苦心率先多士著有勞績是宜記者也侯名思虞庚辰進士常山人維時署教授事張令聞訓導郭維翰黃德孚陳桂芳徐應斗督工則署丞顧正心也南京兵部右侍郎蔡汝賢記

三十四年丙午提學御史楊廷筠濬治學池推官毛一鷺

重建天藻亭

萬曆三十五年重建天藻亭記 郡學向以水脉滌旋出大海紆循龍浦入繞宮牆與艮合流文筆之沙劃然左界而瞰池有亭亭曰天藻蓋以奉世廟宸翰與魁樓前後輝映諸士濯磨振奮于中尚矣歲久圯廢沙亦湮

鬱丙午冬學使楊公洩茲學宮首事濬導幸司理毛公視篆荷鍾如雲泖溇揚波得如其舊然亭構費夥計亡所出公捐餼庀材鳩眾經始未幾亭且聿新士躍躍色起秋試雋者得七人為二十年來未有之豹變詎非盛邁哉史官錢龍錫記

天啟六年丙寅知府仇時古重開玉帶河作斗峯於學之

東南隅 碑記見文昌祠

崇禎元年戊辰知府方岳貢重修學宮

崇禎二年重修學記畧 古之郡守稱民師帥師帥之義標則以觀民詩曰視民不佻言則傲也不則不做民何觀焉是故庠序之教聖王必謹之松澤國也文獻甲天下方侯以清郎出守下車之日俯瞻閭俗喟然歎曰吾知所以治矣人亦有言雖有龔黃無關黼黻其先在教士哉于是羣五庠之士而省試之一日坐園橋而講藝泫然于榱桷几筵之間於是進學官子弟而謀之節縮公私佐以秩俸庀材鳩庸刻成期日而臯門之傾者

起堂廡之敝者葺棟梁之朽者易垣墻之缺者補以八月十九日工與其竣事則十二月初五日黜聖兼施嚴嚴翼翼數十餘年之頽廢一朝頓還舊觀託事于修俸功於創官不告費役不告勞神妥而士歡侯以愷悌之衷勵冰玉之操嫩政不可殫述大要還民禮讓勸學典教以爲民觀侯益深于治理之本者其行自足于古也二三子躋絃誦之區而被文明之象何以頌侯之明德哉辰不敏幸忝末屬適觀厥成請拜手記之府學訓導胡應辰記

國朝順治六年己丑六月明倫堂傾撤宦宅材重建

八年辛卯三月禮部申學政六條於天下學校

一學臣考覈一學臣新舊交代不許代署一定磨勘罰例一生員不許糾黨一教官生員與武職兵丁以事有爭教官生員聽學臣處置不許武臣擅責一教職不得濫委

九年壬辰二月頒卧碑於天下學宮

禮部題奉

欽依刊立卧碑曉示生員 朝廷建立學校選取生員免

其丁糧厚以廩膳設學院學道學官以教之各衙門官以禮相待全要養成賢才以供 朝廷之用諸生皆當

上報 國恩下立人品所有教條開列于後

一生員之家父母賢智者子當受教父母愚魯或有非爲者子既讀書明理當再三懇告使父母不陷於危亡

一生員立志當學爲忠臣清官書史所載忠清事蹟務須互相講究凡利國愛民之事更宜留心

一生員居心忠厚正直讀書方有實用出仕必作良吏若心術邪刻讀書必無成就爲官必取禍患行害人之

事者往往自殺其身常宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不可輕入卽有切已之事止許家人代告不許干與他人詞訟他人亦不許牽連生員作証

一爲學當尊敬先生若講說皆須誠心聽受如有未明從容再問毋妄行辯難爲師者亦當盡心教訓勿致怠惰

一軍民一切利病不許生員上書陳言如有一言建白

以違制論黜革治舉
一生員不許糾黨多人立盟結社把持官府武斷鄉曲

所作文字不許妄行刊刻違者聽提調官治舉
順治九年二月初九日

先是禮部頒學政十八條凡大學考入生員四十名中

學二十五名小學十五名教職不得以衰老充數又與

十一一年甲午六月兩廡戟門成未幾大風雨明倫堂復傾

知府李正華重修及建東西廂

十六年己亥教授周建鼎重修先師廟

憲仲王于蕃捐俸成之

康熙元年重修先師廟碑記 自生民以來以匹夫而

為帝王師則惟孔子之道最尊刪定贊修為萬世之人

極則惟孔子之功最鉅郡國立廟二仲釋奠禮樂同于

王者自天子以至百執事北面虔恭則惟孔廟之典禮

最肅而最脩彌自蘄北憑軾雲間緬惟文獻名邦膠庠

鼓鐘當有十倍他郡者乃雲間一再兵燹由郡治循儒

林坊而南問所謂尊經閣養賢堂及桂香桃浪詠婦諸

亭址漫漶無存及謁先師則見廟貌整肅棟桷一新蓋

教授周君建鼎之所重葺也惟兩廡櫺星門未竟厥工

若留以有待者彌遂捐俸助成焉計後先費精鏹壹千

有奇諸聽縣勸助可十之四周君損貲陸續繕完者半

之其他則出彌俸錢囊粟及諸生之助廩成之者也王

成周君偕諸生請彌言泐之貞珉彌矍然曰可哉蓋漢

初郡國立學自蜀郡文翁始宋初華亭之先聖廟介在

楚刹尚未名學也由元迄明教典益備
本朝車書一統屢敕所在有司修葺學校奏報者得優叙

紀錄乃松郡人文炳蔚之地煌煌上庠說經秉鐸者載

不乏人而 聖廟頽圯雖先有議及者而規制未備甚

哉泮壁之成惟其時亦惟其人也周君以南官高第退

處苜蓿典學三年獎才恤貧清操苦節復能不避勞勩

襄余以觀厥成峯泐之才行與雲
霞蒸蔚矣松江府知府郭廷弼記

初學署頽圯教授周建鼎始闢署於學之西偏作棲鳳堂

及看亭

看亭記 余軒之東偏翛然臨高濤陰扶疎暇豫之時
吟嘯其上意甚樂也適甬上同門史子及超過余問曰
先生既以擁竹名軒矣亭之以看名也豈猶有子猷看
竹之思乎余曰唯唯否否昔衛武公好學惟日孜孜忘
其耄耋撫淇濱之植有感於其中切磋琢磨三致意焉
夫君子之為學也求其積也求其勝也積之內者既久
物自不能勝焉盈天壤之間莫之或遷吾中之所存固
已優矣且夫得失輕重之形日接於目前感而不能自
化者有以累之也我與之為適而不與之俱溺雖至渺
之物皆足以怡我之情而紛華綺麗之臨不能為中
之所固有子以為是菁菁者吾獨鍾愛之乎虛中以處
勁直自持居閑逸之地不與羣卉競而不凋之節君子
宜焉吾何獨不然耶荷曠而言之則凡亭之外山川之
流峙雲烟之聚散草木禽魚之變移安往而不可以奇
吾之遙矚也者即亭之中載籍纍纍其間上下古今賢
聖之菁英斐然燦列瀏覽所及欣然與娛其足以益身
心研理道為當世之所利賴士子之所矜式者何限寧
茲做做焉營神方畝之畔局步數竿之下等於玩物喪

志之為乎史子瞿然久之曰大矣哉看之義乎吾嘗受
業於蓼匪張夫子恒以進德廣業為勗為是榮枯美惡
之見不必擾於中而天地萬物之情所當忘乎外由今
觀之蓋有以驗先生學之所積矣夫固莫之有勝者矣
余以史子之言為可徵也敘而記之并系

以詩松江府儒學教授

種竹已成林良朋忻過之森森盈晨光清陰

周建鼎撰

看亭詩

豈獨私四時有佳會索飲每不遲觥籌競交錯孰知日

西移陶然客俱醉一瓢猶自持白雲頽不流悠悠與共

茲一介有其志三公慎所守榮枯等朝槿變換齊蒼

狗辟疆心所慕金谷豈能久度日詩幾卷容膝官半畝

松風微拂面琴絃時在手枝棲圖自安孰與較好醜

萃亭知縣張超過周裕齋外翰看亭同史立菴太史王

用菴學博韻 海上神山第幾峯胡然飛墜漫相從凭

闌春樹層巒翠捲幔晴烟曲磻封顛米應知芻可拜謝

康竊恐屐難踪此中自有仙人座嘗聽圍碁響碧茸

春風蕩漾草芊芊小徑新開綠蔭天種自湘江常帶雨

韻分渭水半含烟呼朋共喜林中醉獨坐偏宜月下絃

習習清芬滿襟袖

爭如稽阮在當年

射圃 明洪武二年巳酉詔天下學校倣古行鄉射禮

按宋祖初得天下即令天下府州縣學訓誨生員每日講讀經書罷于學後設一射圃教學生習射朔望要試過其有司官閒暇與學官一體習射命禮部定圖式儀註凡八則一射式二樹射鵠三置射位四主射五賞酒六司射七射器八射職九射位十儀注所謂射器者凡九射職者凡七至今天下皆立射圃朔望有司躬謁先師凡聽諸生講讀後詣圃行射禮是即州長會民射於州序之遺意也明初因舉行之後歲久弛廢射圃僅存故址而射禮不行久矣

三年庚戌定學校射儀知府林慶始創射圃於學後故址

猶存

洪武三年定學校射儀前期戒射定耦選職事充司正副司正司射司射器請射舉爵收矢執旗樹鵠陳設訖至日執事者入就位請射者引射正官及各官員子弟士民俊秀者各就位司射器者以弓矢置于各正官

及司射前請射者詣正官前圓揖畢引詣司射器前受弓矢訖復位司正執筭入立於中後請射者詣司射前曰請誘射引司射二人耦進各以三矢指于腰帶之右以一天挾于二指間推年齒相讓年長者為上射年幼者為下射上射先詣射位向鵠正立發矢司正書中投筭置于中舉旗者如所射應之射畢退立於傍讓下射者詣位射訖請射者俱引復位收矢者收矢復于射者司正取所中算請射者次請士民俊秀射次請官員子弟射次請品卑至品高者射其就射位發矢算書中舉旗收矢復位皆如前儀既畢司正副司正各持算白中於主射正官舉爵者酌酒授中者飲之中的者三爵中采者二爵飲訖請射者請屬官以下仍奉弓矢納于司射器還詣主射正官相揖而退

十二年巳未知府鄧處善增葺射圃

洪武十二年修射圃記 國朝郡縣無大小皆得建學學旁立射圃倣古鄉射之禮俾師弟子咸習肄焉松江府學射圃東西廣六十步有奇南北少東西廣五之二前距河架木為梁以達于學外為門垣以限出入中為



堂以閱射職掌則設司正一人副司正一人司射二人司射器二人舉爵二人請射四人收矢二人執翻六人器物則置狐鵠一布鵠二容二兕中一鹿中一翻六等八十勸賞之爵薦羞之俎靡不畢備洪武三年庚戌前郡守林公慶創造焉歲久不治蕪穢充斥日就廢毀十年已未今郡守鄧侯處善同知鄭侯旭通判張惟善命改葺之乃拓其故址徙堂于西易蝨任堅修廢補壞垣墉之頽圯塔城之破缺器物之澆漶不鮮悉皆治之規制宏敞有加于昔工既迄功咸謂郡侯之功不可泯謹刻諸石俾有所徵焉王嘏記

宣德九年甲寅督賦主事李賢祐重作觀德堂於射圃

正統六年辛酉知府趙豫卽射圃作訓導宅三區復買地

以益圃

圃隣茹連王泓李重生義不受直地稅石有四斗邑人楊儼凌翔遠張倫宋頤宋珪何嘉善高劉謙沈箕石瑜陳昌王萱葛瓊唐璟分收於籍云

鄉飲酒禮 明洪武十六年癸亥頒行鄉飲酒禮圖

洪武十六年頒行鄉飲酒禮圖 一各處府州縣每歲正月望日十月朔日舉行於學宮除僎賓外衆賓序齒列坐其僚屬則序爵前一日執事者于明倫堂依圖陳設坐次至日主及僚屬司正先詣學遣人速候賓以下比至執事者報賓至主偕僚屬迎于庠門之外以入主東賓西三讓三揖而後升堂東西相向立贊兩拜畢皆坐候至介至儀亦同既齊至各就位執事者引司正由西階升詣堂中北面立執事者唱僎賓以下皆立各相揖執事舉酒授司正司正曰恭惟朝廷率由舊章敦崇禮教舉行鄉飲非爲飲食凡我長幼各相勸勉爲臣盡忠爲子盡孝長幼有序兄弟恭內睦宗族外和鄉里無或廢墜以忝所生讀畢司正遂飲酒以解授執事仍相揖司正復位及僎賓以下皆拱立行揖禮如揚觶儀及讀皆肅而聽之有過之人俱赴正席立聽讀畢執事者舉饌案至賓前次僎次介次主三賓以下次第舉之乃主獻賓執事者斟酒以授主主受爵詣賓前置于席稍退贊兩拜賓答拜以次奠爵儀如之畢主復位賓遂酬主賓起僎從之執事者斟酒授賓賓受酒詣主前置於席稍退兩拜賓僎主皆拜遂就位坐酒三行湯三品遂徹饌各起離席僎主僚屬居東賓介三賓衆賓居西



行兩拜禮遂送賓分東西
行乃三揖出庠門而退

萬曆三年乙亥以鄉飲賓多濫舉詔申飭提學官

萬曆三年敕諭提學官內有鄉飲禮賓一欵國之重典風教所關近來是非不公濫舉失實激勸何有今後提學官遇有呈請非鄉里推服者不得舉鄉飲賓候如有妄舉受人請求者師生人等即以行止有虧論其從前冒濫混雜有玷明典者照近例徑自查革

四十六年丁巳知府張光縉申明鄉飲酒禮

萬曆四十六年知府張光縉申明鄉飲賓介文曰本府每年于正月十五月初一兩次舉行鄉飲先據師生里老公舉果齒德俱尊者申詳批允方行敦請誠重之也乃邇來風教漸弛濫冒成習生員之保舉既未必至于府縣之查勘竟寢不行呈詞方至于公堂賓趾已及于庠序不奉院道詳允祗憑禮生請乞甚者一經敦請有增無減以至每次投啟十數通請者又未必來然每次必送席十數處辦者苦不能應濫觴之極其齒德俱

隆者反擯之不禮而月旦推重者多恥之不赴本府受事以來未嘗不為之扼腕也合無請明以後凡舉賓介每次不過四人預先兩月行學查明果係年高德邵詳開事蹟具結申詳本道轉呈督學定奪候詳批允方行具請其上青二縣一體永遠遵守庶舉之者無濶濫之嫌當之者實足為大典之重緣係憲老盛典擬合請詳御史駱駿曾批憲老重典凡已舉者多不欲再赴即有再赴者亦何至羣十數人褻越盛舉翻令有道者裹足而不入也以後通行申飭凡賓介以四人為限濫請者罪查勘以兩月前為限永遠遵行

學田 宋嘉泰三年癸亥知嘉興府鍾必萬復學田之侵於民者千八百畝有奇知縣事錢闇以田修學

嘉泰三年復學田記畧 合兩浙之地為縣者以百數華亭最大弟子員眠宅縣率二三倍養士之田數倍於宅縣今直異乎所聞矣知縣事溧陽錢君試補生徒易置職秩百爾具舉一日過余曰今學舍一新闇何能焉實太守鍾侯之賜也日者喪其腴田幾無以為學侯來首治其事遂得從容為教養計學故有僧子韶田一千

八百九十三畝為租六百八十三石有奇上連三泖下通松江之潮歲有水旱無乾溢之虞籍于崇寧之初距今百二歲矣有豪民者以戶絕法請于常平使者不得則以養士奇羨請於戶部於御史臺又不得則鉗制學胥盜其籍攀援中貴人聲勢薦賂宿吏乘守將交代之際以下賈盡得之候來開府屬邑以狀聞之監郡吳君仁傑從旁贊說候奮而起曰此吾責也即付有司既抵其畢復以田歸之學于是人人知侯有意學校豪民姦吏憑藉中貴人而奪之田賢侯布宣教條首及諸此可謂知所務矣寄理修職郎林至記

端平三年丙申知縣事楊瑾勒贍學田於石凡一萬四千四百畝有奇

嘉熙元年學田碑記畧 華亭為邑甲于浙右學之田亦稱其邑獨歲久籍漫來者寢無考士咸病之會邑倣行經界而田隸於學者併得稽焉乃屬有職審訂悉鑿諸石用永其傳邑令楊瑾記

元至正十三年癸巳達魯花赤哈散沙置學田歲三百石

按葉知本書宋時學校田糧府幕官一人專提調出納學官專任教養法每歲春秋有補試中者教官面試能否方許入學行供歲有月試較其優者陞為學職月有旬試教官親書批點以示文法日行兩供陞堂會食輪差職事監厨正錄監書單簿衣冠濟濟絕無冒濫時沙侯委府掾總知學廩適合是法積有餘鎰因置田云

十九年己亥邑人姚玉用獻私田歲租一千五百有二石

以益學廩 詳見周伯琦修廟學記

明嘉靖十六年丁酉知府黃潤置學田二百四十畝以贍

學明代府學有田自此始

嘉靖十六年府學學田碑記畧 國家聚俊髦之士于學既制為廩餼之養而良有司廣上德意則復田焉故田也者所以養士也松為學雖舊而故無田晉江黃侯潤來蒞治加意學校而獨以無田病會民有匿田避稅者侯廉得之悉以畀學為畝凡二百四十有奇於是松之學有田自黃侯始侯既有田以養士矣而養之為義

非可一端盡也願之象曰願貞吉觀願自求口實養人者與養於人者之自養皆有道矣諸君子其無負侯養之之心哉予樂侯有是舉故以養之大義復諸文學之請史官孫承恩記

四十五年丙寅刑部侍郎徐陟捐田三百五十畝贍學

嘉靖四十五年少司寇徐陟割腴田三百五十畝每畝租壹石每年租米三百五十石送學贍貧共課及貼堂齋俸米一應公費載在碑記可攷

萬曆三十六年戊申郡人知府徐琳捐田一百七十五畝

有奇草蕩七畝承蔭司丞徐肇惠捐田三百畝有奇贍學

萬曆三十六年蒙提學御史楊廷筠批發鄉宦知府徐琳捐送本學義田一百七十五畝五分草蕩田七畝該租壹百七十一石八斗五升承蔭司丞徐肇惠捐送義田三百畝零三分六毫該租三百四十九石九斗八升行學收冊除完錢糧餘米聽學查將貧生及會考月課公費等項詳免放給

三十八年庚戌巡按御史楊廷筠以贖鍰置田六十七畝

有奇贍學

萬曆三十八年巡按御史楊廷筠清理贖銀二百五十五兩發府貯庫于三十八年買學田六十七畝九分二釐該租七十三石一斗九升奉縣遵照將應徵米附入漕糧冊除扣正賦餘米聽本學歲終將貧生詳免支給

四十年壬子巡撫應天都御史徐民式置田六十九畝有

奇贍學

萬曆四十一年蒙巡撫都御史徐民式巡按御史薛貞批本府申詳勘買學田六十九畝三分六釐三毫價銀二百六十六兩二錢五分六釐該租米七十三石四斗一升一合除完本折錢糧該餘米四十九石五斗凡遇供課賑貧詳免動支登報循環一年兩給永為定例

五學學田碑記畧 大中丞徐公鎮江南甫下車檄四郡長吏曰今天下煩賦役重吳為最吳中民苦田土苦

無田坐是日益貧此我司土者責也甦百姓之困無若清役田欲贍多士之貧無若置學田適蘇郡丞許君攝關務得濟墅羨金六千一百有奇牒聞大中丞大中丞質之直指房公薛公曰以此贍士可乎松郡守張公受命銀必親發田必躬勘刻畫圖號使售田者不敢借瘠為腴佃田者不敢隱多為寡至是大中丞愛民養士之心始無遺憾矣古者士有塾塾有田今高才生餼于官者循故額止矣而士之蛙寵不黔螢案不膏鶉衣不結鰥居不伉馬鬣不封者得大中丞而始克有濟善一履畝有籍徵租有程歲出有經歲入有會塞奸詭隱射之門杜豪強兼弁之竇善二非贖鍰非沒產非強富人之樂輸者取諸權羨而自足善三以權羨聞之朝則恐開增額之漸置之公家則又恐那移飛借化為烏有子虛今不惟貧士沾恩抑且大中丞見節善四松學田創自宋泰寧間又再創于郡守黃公潤歲久籍亡不聞有給自大中丞者有之自徐公始善五大中丞起家松司理人疑其義切弁州而推之徧及于旁郡邑子弟無公門桃李之私而有萬物一體之量善六一舉而六善具大中丞足以記矣說者曰無恒產而有恒心惟士為然嗟乎士當以此自責上不當以此責士顏氏之貧也而簞


瓢曾子之貧也而財見子路之貧也而負米聖門且然而况後世之士獨望其以苦節固窮見夫乃非人情乎然士必能養正而後始不負大中丞置田養士之德意弁以為松士勸焉郡人陳繼儒記

三十四年丙午南京兵部主事吳炯捐田八百畝於學歲

給諸生應試

萬曆三十四年府學義助應試碑記畧 郡邑兩學三年大比賓興上國陪京相遠千里而遙士擔帷策蹇衝炎冒涉得無有裹糧不給旅次難措車楫途窮者乎駕部懷野吳公亟于憐才捐田八百畝歲收其入凡與應試者人而助之大比歲約費銀四百餘兩其與司空太僕郡邑侯後先擅美矣蓋公之尊人嘗游郡庠而駕部公亦由此起家登庸仕籍是舉也其殆水木之思哉多士蒙公之澤惕然奮起庶幾相與有成可以答公之觀耳史官張以誠記

四十七年己未教授王繼美清理學田



萬曆四十七年府學清田碑記 淮南王公元玉為吾郡學博士長是歲冬來蒞事進諸士剖析四子六經與義翕然鼓舞公瞿然思曰學宮有養賢堂左右齋居庖漏具在堂後傑閣藏書具在而晝掩無問奇者田畝歲入亦具在為飢役所窟穴至無能詰問則司教者之失職謂何遂請於當事躬暑雨行阡陌二十餘日一旦奸賣盡露于是田還之學食還之士諸生無復以飢寒隳名檢而公之教始無不得之士矣是粟也舊為役人半入私橐輒慳其出以抑士而概目之為賑士非貧與死隣弗願受粟公品予格為三除貲產能供俯仰弗給士有貧而勵志節者給勤學問者給有困阨當周者給仍顏其倉曰儲士而官為授餐人人視升斗若榮施益砥勵文行期無負公教養云計公所清田合撫臺徐公所置少司寇徐公陟太守徐公琳及尚寶公肇惠所樂助總為畝幾九百萃亭章侯允儒復請發助贍太僕少卿吳公燭捐田租助諸生入試之役割田二百五十畝屬府學半以助養皆感公養而思佐其盛者也巳未三月擢佐南雍教事為礮石記之史官張鷟記

名宦祠舊在學宮之左明末傾圮至

國朝順治九年知府廖文元重建於玉帶河之北自朱以來在祀典者具列焉

知華亭縣事楊瑾

元松江府知府王至和

松江府學訓導胡存道

明華亭縣知縣馮榮

戶部尚書夏原吉

督學御史孫鼎

松江府同知王源

巡撫南直隸工部尚書周忱

松江府學訓導魏驥

松江府知府趙豫

巡撫應天兵部尚書兼右都御史王恕

巡撫應天都察院右副都御史彭韶

提學御史戴珊 松江府知府樊瑩

提學御史婁謙 提學御史陳選

松江府學教授王度 松江府學教授程燦

松江府學教授譚璋 松江府知府何鰲

提學御史章袞 松江府知府黃潤

松江府知府何繼之 松江府學教授許鑰

松江府推官姚唐 蘇松道兵備副使任環

華亭縣學教諭許以明 松江府知府方廉

巡撫應天都察院右僉都御史海瑞

巡撫應天都察院右僉都御史林潤

松江府知府衷貞吉 松江府推官李楠

松江府知府許維新 華亭縣知縣熊劍化

華亭縣知縣章允儒 松江府同知范永年

巡撫應天都察院右僉都御史周起元

鄉賢祠舊在各宦祠左明末毀廢

國朝順治九年知府廖文元建於玉帶河北各宦祠之西


考前志列名及近所崇祀者具載如左

漢廬江太守陸康

吳鬱林太守陸績

晉平原內史陸機

清河內史陸雲



梁黃門侍郎顧野王

宋資政殿學士贈太師秦國公謚文節衛涇

明河南睢州知州任勉之 浙江錢塘縣知縣葉宗行

國子監祭酒陳詢 淮府長史李伯輿

南京禮部尚書贈太子太保謚文通錢溥

淮府紀善贈太子少保刑部尚書張璠

山東布政使夏寅 工部營繕司主事宋瑛

南京兵部尚書贈太子太保謚莊簡張悅

南京兵部尚書贈太子太保謚莊懿張瑩

總督兩廣軍務都察院右副都御史唐珣

江西南安府知府張勣 浙江按察司副使曹時中

翰林院修撰錢福 廣西按察司副使張祚

福建延平府知府累贈太子少保禮部尚書孫衍

南京禮部尚書贈太子少保謚文僖顧清

詹事府詹事贈禮部右侍郎謚文裕陸深

徽州府左長史吳稷 貴州布政司右叅政沈霽

廣西按察司僉事曹閔 浙江溫州府知府郁山

湖廣武崗州學正高博 湖廣按察司僉事許璘

刑部郎中周佩 陝西涇陽縣學訓導何震

戶部員外郎張昕 廣西按察司副使張弘宜

江西寧都縣縣丞贈少師建極殿大學士徐黼

雲南按察使李希顏 南京刑部郎中李儒

戶科左給事中贈光祿寺少卿楊允繩

湖廣道監察御史贈光祿寺少卿包節

南京河南道監察御史贈太僕寺少卿包孝

大理寺卿胡岳 太僕寺卿沈愷

太子少保禮部尚書贈太子太保謚文簡孫承恩

少師吏部尚書建極殿大學士贈太師謚文貞徐階

都察院左都御史贈太子少保謚恭定潘恩

南京吏部主事高士 廣西思恩府知府錢師周

通政使司右通政趙灼

廣西提學副使周思兼

大理寺左寺丞贈浙江布政司叅政馮恩

南京工部郎中李昭祥 南京兵部郎中唐自化

浙江右布政使莫如忠 南京刑部右侍郎徐陟

應天府推官贈兩浙都轉鹽運使陸應寅

太子少保禮部尚書贈太子太保謚文定陸樹聲

巡撫山東都察院右僉都御史陸樹德

太常寺卿贈太子太傅徐璠

南京兵部侍郎蔡汝賢 儒官莫如爵

旌表孝子應天府通判馮行可

南京太僕寺卿林景暘 南京太僕少卿吳炯

陝西布政司叅議王圻 廣西思州府知府蔡懋昭

刑部主事封四川夔州府知府徐三重

贈浙江布政使王俞 贈翰林院編修楊道東

贈太子太保禮部尚書董漢儒

南京工部郎中俞汝為 福建提學副使方應選

太常寺卿贈太子太傅徐元春

禮部右侍郎贈太子少保禮部尚書謚文恪唐文獻

山東蓬萊縣知縣贈太子太保東閣大學士錢大復

南京吏部主事陸彥楨 工部主事章憲文

右春坊右諭德張以誠 翰林院檢討高承祚

右春坊右諭德楊繼禮 浙江道監察御史沈時來

光祿寺署丞顧正心 文學張大綸

封大理寺寺丞李益亨 贈浙江布政使王克讓

浙江台州知府王孫熙 贈兵部主事王煒

太子太保禮部尚書文淵閣大學士贈太保謚文定

徐光啟

太子太保禮部尚書贈太子太傅謚文敏董其昌

吏部文選司員外郎贈太常寺少卿夏嘉遇

廣東饒平縣知縣王焯 贈刑部主事莊允中

贈國子監監丞王焯 浙江右布政使張爾嘉

河南胙城縣知縣封浙江布政使莫天洪

封浙江按察司參政杜若芳 廣東雷州府海康縣學教諭張萬幾

陝西涇州知州謝自孫 浙江景寧縣知縣沈可紹

應天府通判黃廷鵠 贈都察院僉都御史沈昂

工部員外郎王廷栢 贈監察御史張美

廣東按察使何萬化 湖廣邵陽縣知縣張軌端

國朝封行人司行人王典 贈吏科給事中朱雲昇

社學 明洪武八年乙卯詔天下立社學

洪武八年三月奉禮部符府州縣每五十家設學一所延有學行秀才教訓軍民子弟仍以師生姓名申達于

是本府兩縣城市鄉村皆設社學後因有司里甲以有丁子弟有暇讀書者受財買放無丁不暇者逼令入學民人受害而革乃許有德之人不拘所在及子弟名數每年十月初開學至臘月終罷如丁多有暇來讀者聽若有司里甲干預攪擾者治以重罪三十年令教讀秀才各引學生赴京講讀大誥賜鈔有差

正統元年丙辰詔立社學生儒

河南左布政使李昌祺奏准于直隸府添設監察御史按察司添設僉事一員專一提督學校首興社學着落府州縣正官約量所管人戶多少地里遠近設立社學延師訓誨童蒙使句讀分明義理粗曉遇有儒學生員考選即于社學無過犯之家高等子弟內選補 天順元年提學御史嚴淦遵行本府于城市設社學一所鄉村每區各一所擇師訓誨絃誦相聞其子弟多充庠序之選焉

蒙古字學 元至元八年立在府治普照寺之西昔稱右

庠有田贍學今久廢

至正四年學田記 世祖既平函夏欲同天下之文爰命師巴思八誤蒙古字紀載國語用五音反切以譯六書之文于以達王事通天下之志凡州郡置博士弟子員例同儒學列聖繼志思厥茂功立廟以祀如孔子儀松江府廢立不恒故學宮之設獨後棗盛廩餼視他郡最為貧乏至飢其師不能久處以去至正四年普照及証覺寺僧割田若干畝為學宮永業于是廟祀學廩賴以粗集教授察罕不花王君務道屬予為記秦裕伯撰

書院

元元貞元年乙未知府張之翰建西湖書院

書院在湖

中洲本宋泳波亭後為放生亭中有燕居樓奉 宣聖遺像縣初陞為府改燕居堂為縣學之翰記中所謂混一以來夫子燕居無所故作樓奉之者即此也大德間華亭人邵天驥重建元統甲戌知府申秉禮重修遷姚氏義塾其中以便來學一時生徒甚盛幾數百人至正中于此築城遂廢顧誌曰續志瑁湖東洲有環碧亭與中洲相望今中所演武場後有黃冠居臨水近城曰西湖道院疑此即環碧故基而其西城壕乃書院地也元貞元年書院記 余知松江之三年登郡西南放生亭基基在水中央問其水此西湖也考諸志西湖乃瑁

湖晉為陸氏養魚池宋為放生池或傳此即谷水水有舟嘗湧五色泉郡人士見者必擢第余徘徊久之方府治撤真聖樓遂命工樓其北而廡其西樓之上以像燕居庭之中以壇社稷廡之左以位名賢廡之右以舍師儒與諸生乃榜曰西湖書院因筆之為記買地之貲萬三千木瓦之費共二十萬有奇松江知府張之翰記延祐六年重建書院記 元貞改元張公之翰來守政本經術尤雅意文菀邑西南二里有積水相傳云晉陸瑁家池志稱西湖乃創書院于其上大德辛丑朔颶風大作壞棟宇越十有八年莫能復延祐六年廉訪副使張公揆行部始至歷覽故址慨歎久之屬今守注公從善新之邑士邵君天驥輕財樂善遂以部使者命延禮敦勉之邵君欣然聽命度材鳩工閱歲而禮殿成至治改元春張公國英以毘陵推官來宰茲邑復勉邵君乃與其子彌遠猶子彌高勵相斯役掄材于山埏甃于陶官無費財民不與役未數月以竣事告像燕居于殿侑以顏曾申申天天儼若親炙繪名賢先哲于廡之左舍師儒友生于廡之右輿梁前聳講堂後臨下逮庖湍織悉不遺視舊制益闋麗有加郡侯率僚屬釋菜以妥神位籩豆秩秩衿珮鏘鏘獻酬升降動有則法蔚乎文物

之盛也士民觀者如堵咸有所感發而興起焉乃輟俸買田二十畝邵君復捐田五十畝為之倡邦人之慕義者亦捐田有差以邵君世主祠奉請置山長員如章庶乎其傳久而無弊也請記其事趙孟頫記張禹論興復書院書自古王教之成也崇本而易其末導晦而復之明為之立學校義塾書院時告之以聖賢之路而興起其哀欽仁義之心故夫小學洒掃而入義塾師儒廣厲而入學校若夫書院之設羣薦紳父老子弟而歲日月為之會迎四方之高賢達士登講者之席質疑辨難以明其教習雍容登進主客揖讓之儀以和其氣窮性命精微推廣天地萬物以為國家之用故講習熟而型摹立心性開而志氣振其于民皆有赧然油然而不自甘于淫放也今夫松澤國也地洳而人柔善下無有卓然強立肩道之重者則書院之興起何可少也今黨庠之間羣弟子而官師訓之薦紳不入席也里社父老不與聞也遠方之高賢達士未嘗過而問也願明公設書院一路以講習型摩之松之書院如九峯西湖皆可攷也九峯地囂而不可復西湖之址一名谷水沿西郭而南地莽蕪而汗邪洞曲羣木聳植尚存

環碧泳波之遺意在朱元貞為孔子燕居樓在元至治為姚氏義塾在今日為一郡融結之地而閒曠無用同于櫟社復而剏之易為力也明公以理學名世建節南土膏雨之潤不擇萋枯陽和之溫寧遺寒谷而吾松僻壤一隅不獲見德化之盛觀禮樂道德之原是亦明公之所惻隱也夫射之于廣漠也一人焉樹之招則衆逐而善射出矣此樹招者力也望洋而濟見艤舟焉而人競渡矣操舟者益於濟也夫王教之成亦若此矣伏惟明公興復書院廣講習敦摹式推廣郡縣薦紳之美意以慰父老子弟嚬喁之望仁澤浹乎飢膚德教翔乎海隅明公之恩施與聖澤俱不朽風俗幸甚

九峯書院在府治西北邑士衛謙初後趙驥以宋李綱生於華亭請立書院以祀遂祀綱於此

趙驥請祀李忠定議按松江郡志折桂閣在尉廳右觀文殿修撰李公夔元豐初為尉時生大丞相忠定公綱於此因呼為相公閣世代綿遠廳與閣俱廢而生賢之地愈久而愈光矣自昔聖賢生育宦游進修之處皆

立書院以敬其德業而嘉惠後人也及按宋史綱登政和二年第七年為太常少卿時金人渝盟邊報狎至朝廷議避敵之計詔起師勤王命皇太子為開封牧令侍從各具所見以聞綱上禦戎五策又以巨敵猖獗非傳以位號不足以招徠天下豪傑東官恭儉之德聞于天下以守宗社可也俾給事中吳敏極言之及召入議刺臂血上疏徽宗內禪之事乃決此忠定勸進揖讓之功業也徽宗東幸宰執議請上暫避敵鋒綱謂道君皇帝挈宗社以授陛下委而去之可乎今日之計當整飭軍馬固結民心相與堅守以待勤王之師此忠定守社稷之功業也至以綱為留守為親征行營使以便宜從事綱身督戰募壯士縋城而下斬酋長十餘人殺其眾數千人于是金人退此忠定攘外之功業也及綱罷而京師陷矣高宗開大元帥府承制復綱故官至以為相正張邦昌之罪惜乎僅相七十五日而高宗不能用終于荆湖安撫後謚忠定文章德業相表裏是宜建立書院以奉宣聖併以祠之


義塾 夏氏義塾在府治東南淨土橋東

元貫雲石記畧 松江夏君椿建義學請師育諸英秀以舉大義學模既成則錄吾儒李君道坦所撰義士家傳暨前翰林待制江南諸道行御史臺監察御史周君馳所撰義士碑遺予請文刻石以示子孫永行不廢贊曰義行所宜尊師重道餘力學文本務忠孝唯學有用唯國有報嗚呼小儒敬鳴敬告

先賢祠 宋慶元四年戊午知華亭縣徐民瞻作祠祀宋

參政錢良臣

慶元四年建錢公祠記 慶元三年夏四月庚午知華亭縣徐民瞻始至詣學謁廟再拜庭下既乃巡廡展誠于從祀者西廡有祠焉勝日參政錢公之祠載瞻載仰致敬而退越三日更朔修故事帥諸生行奠謁之禮已而升堂諸生以序次第見進之坐語環視內外單單整整棟宇翼翼階廊舒袤窻几明潔講肄有位職掌有室庖廩有次不侈不陋顧坐者曰美哉斯學之久而新也問其年則曰卜築于斯土者元祐末歲也後八十有八年繕葺而復以至于斯者淳熙己亥冬也成己亥之事者乃今祠于西廡參政錢公也公諱良臣字友魏生有



嘉聞刻志于學十七試藝補入學十九陸太學又十年
 登進士第而歸謁謝先聖先師凡昔從游同舍士攝衣
 迎拜歡喜道舊顧盼殿堂齋舍非復前日公蹙然不寧
 曰去此甫十有二年時異事廢何其遽耶它日幸宦遊
 凡可致力者宜勉歷二十五年公參大政猶念念不置
 轉運司有材木之在華亭者去學不里所公聞之喜曰
 吾事集矣一日轉運使以職事遣府公以語之即日悉
 以木株四千有奇異學時縣令徐君安國藉以經營逾
 年而克成殿堂廊廡齋室廩庫瓦椽就傾檐楹將敗者
 一切起而新之塗暨冊牘輝煥明蕩不替于昔由是鄉
 老學士大夫喜學之復興而感公之不忘本也翁然相
 勸或遣其子弟肄業磨礱浸灌爭騰踔于學皆公之賜
 也鄉人請于令祠于學官屬受代未暇楊君樛年實繼
 領縣事遂堂而祠焉今十有九年矣未有記其事以詔
 後者謹叙其所聞庶知公之不忘于學而士大夫之所
 以不忘公云奉議郎知嘉興府華亭縣主管勸農公事
 兼兵馬都監
 徐民瞻記

五年己未知華亭縣事徐民瞻作二俊堂祀晉陸機陸雲

慶元五年二俊堂記畧 二俊堂者陸士衡士龍祠也
 按圖記縣之西二十五里有華亭谷谷旁之山曰崑山
 陸氏自昭侯以來世居於此墓域在焉昭侯衡大父也
 衡詩所謂彷彿谷水陽婉變崑山陰者此也余嘗登其
 山物色故迹湮沒不可得獨有征北將軍禕墓焉衡之
 死九百餘年矣田夫野牧皆能識其名氏道其故實山
 之北有機雲兩山亦以兄弟得名豈鄉人愛之深思之
 至乎抑光華燁燁之氣誠有不可埋歿者知縣事信安
 徐君民瞻買國子監書以惠鄉學為堂于學之東廡遷
 圖像俎豆于其中因晉人張茂先之言以名其堂且屬
 至書之至竊惟古之教學者則祭之瞽宗儀表一鄉者
 則祭之社尊道德詔後來自昔所不廢也衡兄弟才名
 如此而所謂尊賢之義其可已乎然則君之為是堂也
 其風美其焉君練日薦饗于堂下邦人慰且喜也于是
 為之歌詩以相其祠事云采采兮紫萼合蘋蘋兮薦誠
 遲君不來兮吾心靡寧雲幽幽兮晦冥野有兕虎兮水
 有鱣鯨羗何為兮舍故而就新被服兮孔翠鏘鳴兮瓊
 琳朝杭兮水波夕駕兮山嶽恩多兮報重寵極兮害深
 一陰兮一陽孰參兮化施孰質之賦兮孰命之為世清
 兮才良蹇余步兮蹉躓誦懷土與九愍兮而獨悲此故

鄉五茸兮雲寒三泖兮水寬鶴唳兮莫聞漚鷺兮飛飛
來愁兮無盡往悔兮不可追登君之堂兮惟君之思寄
理修職郎新差充淮南西路
安撫司幹辦公事林至記

元至元十六年丙申教授馬允中重建二俊堂於藏書閣

之西廡以唐陸贄配享稱為三賢祠

元貞二年重建二俊堂記畧 松江府學舊有二俊堂
隸學之東廡秘書林公為之記宋端平丙申學遷而南
堂湮弗治至元癸巳郡博士河陽馬允中職教此邦興
滯補弊百廢具舉每以陸祠未復為闕典謀之鄉先輩
百爾經營越二載餘始得之爰庀役程材構祠于藏書
閣之西廡衡位其中龍序其右且以宣公敬輿配其左
逾四百七十餘年文章事業前輝後映神爽如生是祠
也昔端平之丙申既遷而廢今元貞之丙申復創而興
名賢五百年間出殆有數焉郡博士之有
功于斯堂也顧不偉歟前進士徐有極記

至正二十三年癸卯同知顧逖重建三賢祠於藏書閣北

至正二十三年重建三賢祠記畧 瓊嘗求天下士若
晉陸士衡及弟士龍此以文章名一世者乎唐陸宣公
此以事業著萬世者乎初士衡兄弟之歸晉也張華曰
伐吳之役利獲二俊史稱其遠超枚馬高躡王劉宣公
之佐唐也嘗日上不負天子下不負所學先儒稱其智
如子房而文則過辯如賈誼而術不疏華亭舊有二俊
祠至正二十三年松江通守顧侯逖教授馮恕拓地大
成毀北構堂而遷之弁奉宣公焉明年春瓊承分教之
命始獲拜其像而瓊嘉興人也數往來華亭幼讀三君
之書未嘗不服其雄辭大節恨不得起于九原而欣然
執御焉乃贊之曰倚歟盛哉一門二俊龍翔鳳騫天運
既移國鄙臣遷才高匪福道否終愆蘭悲塗翦玉恥璞
全譎譎宣公華峯一柱眾邪而傾孤立無與炳炳萬言
以藥人主功濟時屯謗由直賈有烈其芳有擘其光近
宗遠法豈惟一鄉九山峩峩與岳相
望匪山之高伊人之良構李貝瓊記

至正二十三年癸卯知府王雍繪故訓導胡存道於學二

十四年甲辰知府王立中為文勒石其所又請謚於行省

至正二十八年胡先生畫像記畧 至正十六年苗軍至松江大發公私藏趨郡學無所得將火之時訓導胡君師善曰吾所以不去者為學守也當與俱存亡遂逆而叱曰若寧殺吾學不可毀也兵怒刃之死二十有三年太守晉寧王侯雍命繪像東廡春秋祠而報之及蜀王侯立中至用教授馮恕言請謚于行省初師善受命部使者來分教裁閱月而兵起二月十有八日夜外內舉火烈焰亘天師善亟命群僕閉門防寇徙薪辟火火且逼西北垣乃率同舍生李復賈兼善吳克敏宋起潛升屋大呼注水沃之又令民撤草坊許新其屈既而天乃反風故東西佛老之宮咸燬此獨巋然如靈光實師善力也後竟死方其變起倉卒凡在官者莫不駭散奔走師善會稽布衣耳不食其祿不任其事乃能圖完夫子廟至殺身不悔嗚呼死非難死得其所為難師善無愧于聖門七十子矣後三年太守王侯知事吳陵徐君克初謀立石表其節以風厲為士者俾闕叙之具闕記

國初祠廢順治十六年教授周建鼎復祀于明倫堂西室

明正統七年壬戌知府趙豫遷三賢祠於學之右及漢陸

康吳陸績宋楊瑾元王至和胡存道並祀榜曰尊賢後益


以明戶部尚書夏原吉祭酒前教授胡儼成化壬辰益祀

南京吏部尚書前訓導魏驥教授孫鼎於尊賢祠

附文昌祠 文昌祠舊祀其神於學之西廡明正統九年

甲子通判黃平始作文昌祠

正統十年重建文昌祠記畧 天下學宮悉置文昌祠文昌非祀典也而士游學宮者晉謁宣廟必退禮祠而尊信而敬畏之何耶晉天文志曰斗前六星為文昌集討天道及清河內傳與其所謂化書皆稱神始誕于梓潼縣之七曲山以忠孝教人松郡學有祠在西廡歲久滋敝且迫湫隘觀者弗稱正統甲子十月教授廬陵王禮與訓導建陽江漢謀廓而新之吏部主事西蜀黃公平來判府事籌議允合而同知浮光翁公仲舉萃亭永番易章鳳應亦慕義來助撤故市新作屋三楹繚以周垣局以重門都指揮使瀋陽翁紹宗亦大其像設規制



宏敞卅聖鮮美稱夫神明之居明年乙丑三月三日既訖功錢溥為之記

萬曆四十七年己未教授王繼美重修文昌祠

天啟六年丙寅教授陳鍾盛移建文昌祠於斗峯

天啟七年重開玉帶河築斗峯移建文昌祠記畧于玉帶河者闕塞五十餘年填路六十餘丈人議開而憚于慮始迨甲子諸士阨于賢書余始愴心即其地培為高峯因建閣于上以祀魁星傍有一井余疏而濬之銘曰斗泉焉文昌一祠頽圯久之萬曆己未教授王君繼美捐俸重建乃其故地在啟聖宮前覺與大成殿有間神且不妥茲則遷之斗峯之陽令文昌與北斗遞相接引則又不越兩月而成成而後文運之亨可知也尊經閣後原有一亭曰咏歸亭余祖威公以御史出守此中修葺聖殿改為兩亭曰桂香桃浪今俱無存後人額其一曰玉帶河亭余為仍桂香桃浪之額而稍新其亭濬河之政維時郡邑大夫視為已任不越月而玉帶河周迴映帶舟楫四通既而相尊經閣後舊有魁星閣高與閣等今且坍塌數十年而基址低凹成谷地脉若斷余以

開河之士築峯移祠合于形家云是役也計費二百餘金自余捐俸外更有借輸明年學租來助者則吳太僕公計貲二百先入其半餘以俟異日之修舉時余忝司教將蒞北雍姑記之以識歲月陳鍾盛記

國朝康熙元年教授周建鼎重修

知縣馮賡張頤恒訓導黃中亨許國禎各捐俸

康熙元年重修文昌祠記 吾儒鼓篋操縵誦法孔子故孔廡從祀非鄒魯高弟子即歷代表章聖學諸大儒其他僊跡應化為二氏所誦說愚眊所取禮者不與焉文昌神誕降于梓潼之七曲山道書解開化元皇亦曰梓潼神雖見之化書而不見之正史乃天下習章句廁縫掖者輒家祀而戶祝之又或附祀於泮壁宮墻者何為也天官書有言斗樞戴匡六星曰文昌宮六星者一曰上將二曰次將三曰貴相四曰司命五曰司中六曰司祿晉史亦云文昌在斗北魁前五集計天道由此觀之精茫上蟠光氣下通學士大夫致身通顯或實有主持而培佑之者其俎豆祀享蓋以福善禍淫之權而動人以崇德修慝之思亦神道設教之意也松郡學故有文昌祠在啟聖宮前天啟丙寅教授陳公鍾盛改建于玉帶河北之斗峯更歷兩朝廟貌摧剝不揣綿力輒捐

俸重葺之其規制視舊無改而椽桷整麗丹堊輝煌過瞻祠下者嘆為郁郁之文或亦一郡六庠文運克昌之兆也郡人士請余言記之因授簡而勒之貞石進士教授周建鼎記

附魁星樓 宋咸淳中知華亭縣事趙與伉作魁星樓於

梯雲橋之南 秘閣校勘張洪有記記今不存

明成化辛丑知府王衡作魁星樓於尊經閣後明末燬

國朝康熙二年知府郭廷弼教授周建鼎復作亭於斗峯

附教授譚程二公去思碑 吾松有兩賢郡博曰西廣譚子名璋正德丙子由餘姚教諭來教後六年嘉靖戊子程子名燦由曹州學正繼之教乃不振士用大治譚子敦厚和易故為教寬而恕程子端方諒直故為教嚴而正于是謹條約崇禮讓斥浮澆抑奔競至其自愛要以風節自厲去淫祠以祛俗蔽謹祀典不以勢位屈蹈履繩墨以身為諸士先二君子之所事蓋不能以盡同而要其所以教皆以作人為急至其體悉諸士軫念憂

蹙視若子弟然恪慎勤勞繕治學宇殫厥心如家事斯亦靡殊焉譚子居八年被讒解職去士奔走泣送程子三年而擢鹽城令士猶戀戀其去久而益勤則謀立石并志二君子以寓其寥邈之思乃作碑記孫承恩撰教授夏君去思碑記 今之政碑濫矣乃教碑尙濶希也吾郡教授夏君質直尚氣要一視義可否即當義雖挺身為士類不恤即不當義雖忤上官遭流輩挫折其氣不少回也尤持廉操不問諸生餽遺惟程行業謹楷範孳孳訓迪若不給約束諸生以時校文具有規準諸生即士紳裔苟越度虧課藝必督過不少假其諸婁人子或力所不逮顧嘗寬紓之令氣得伸甚而捐俸入資其諷誦少年人試高等必教誠令無驕佚若暮途篤修間多推揚不令失志蓋君重義分不徇世情一時榮利低昂之習少沮焉翔紫薇祠表章胡師善先生死節他如公義租恤孤貧力白董姜兩生冤狀又君職思其位之餘誼也先是君令新淦務修實政以與上官相左卒改教及是復拜高淳令君名大勳字謙甫廣東饒平人嘉靖丙午鄉舉

學博丘先生去思碑序 余觀近季稱學官之才獨取連江丘公公起八閩以歲次教金華再括蒼而迄于松

以身爲治以忠信孝友爲五型八范鼓鑄而翕張之士
有盛氣以進者未嘗不心折引繩墨以自蹈也公既長
者不爲矯厲以博名而樹標建鵠又凜不可私士故憚
其嚴而又樂其寬固結于多士有素也史官唐文獻撰

府學公占基地共四十九畝六分九釐二毫俱免科糧

華亭縣四十保一區南內二畝天字圩 二十二號九
畝五分七厘三毫係魁星樓敬一亭義倉宰牲池依仁
游藝志道三齋衙宇 二十三號一畝九分二厘五毫
係游息所 二十五號六畝三分三厘八毫係射圃
二十九號一分八厘九毫係先賢墓 三十號八分一
厘五毫係鄉賢名宦祠 三十一號十四畝四分四厘
八毫係先師廟啟聖宮崇德堂明倫堂養賢尊經閣等
號十畝九分七厘係天藻亭明堂七星潭 四十八號
一畝一分係紫薇祠官廳 四十九號二畝八分一厘
四毫係正堂衙宇 五十五號一
畝二分六厘八毫係據德齋衙宇

松江府志卷之十九 終

松江府志卷之十九 終

